

# NZAMBI KE NA

## KUKITALISA YANDI

### MOSI NA BIDIMBU YA YANDI



Mu vwandaka na mwa ngitukulu na kumona nkundi ya munu, Joseph Boze, kuna, mpe mu balukaka mpe mu bakaka ntangu fyoti na kupesa yandi mbote.

<sup>2</sup> Beto luta ntangu yayi na Ndinga ya Nzambi, na Hebreux, kapu ya 1. Mu zola kutanga, mutindu ntangulu, nzila ya 1, ya 2, mpe ya 3, samu na kuzwa dilongi ya nkokila yayi.

*Nzambi, yina na bambala mingi mpe na mitindu mingi kuzonzaka na bantangu ya ntama na bankoko na nzila ya baprofete,*

*Kasi na bilumbu yayi ya nsuka ya me zonza na beto na nzila ya Mwana ya yandi, yina yandi me sala mfumu ya bima nyonso, mpe na nzila ya yandi diaka yandi me yidika yinza nionso;*

*Yandi yina vwandaka na nsemo ya nkembo ya yandi, mpe kutalisama ya kifwanisu ya bumuntu ya yandi, mpe ke simba bima nyonso na nzila ya ndinga ya yandi ya ngolo, na manima yandi vwandaka . . . yandi kwendaka wanda na mazulu na diboko ya kibakala ya Kimfumu;*

<sup>3</sup> Beto kulumasa bayintu ya beto ntangu yayi samu na kusambila. Mpe ntangu yayi na kati ya Mvwandulu ya Yandi ya Kinzambi, kana beno ke na lombilu yina beno ke zola kuzabisa na Yandi, beno ke zola kaka kutelemisa diboko ya beno, mpe yina zola tuba lombilu ya beno, ti Nzambi ke . . .

<sup>4</sup> Tata ya beto ya Mazulu, beto ke na kupusana ntangu yayi na ntuala ya kiti ya Nge ya kimfumu, na nzila ya lukwikilu na Nkumbu ya Yesu Klisto, Mwana ya Nge. Mpe beto me kuzwa kivuvu yayi, ti, “Kana beto lomba konso kima yina na Nkumbu ya Yandi, ya ke pesama.” Mpe Nge zaba baluzolo mpe bansatu ya beto, mpe Nge silaka ti Nge ke pesa nyonso yina beto ke na yawu nsatu. Na yawu, Tata, beto ke sambila mutindu Nge tubaka na beto, “Ti Kimfumu ya Nge kukwisa. Ti luzolo ya Nge kusalama na ntoto, mutindu mosi na Zulu.” Ti lombilu ya beto, na nkokila yayi, kuvwanda na kulandila yina Nge zola kupesa, mpe pesa beto mambu yayi ya mfunu. Pakula Ndinga, Mfumu, mpe bawu nyonso yina ke tuba mpe ke kuwa, mpe ti Mpeve-Santu kukwisa mpe kukotisa Ndinga na kusalu, na nkokila yayi, na kati ya beto. Samu beto me lomba yawu na Nkumbu ya Yandi. Amen.

Beno lenda vwanda.

<sup>5</sup> Mbasi na suka, mu me bakula ti, ya ke vwandaka na lukutakanu ya madia ya suka ya Bantu ya Mumbongo ya Nsangu ya mbote ya Muvimba. Bambala mingi, kisika yina bawu ke kutanaka, mu ke kuzwaka siansi na kutuba na lukutakanu ya bawu ya madia ya suka. Tii na ntangu yayi, ya ke kaka organisation, ya ke organisation mosi ve, kasi, kaka nkonga yina mu—mu kele na kati, ya kele Bantu ya Mumbongo ya Baklisto. Mpe ntangu yayi mu ke longaka samu na bawu, na yinza ya muvimba.

<sup>6</sup> Ntangu yayi, na nkokila yayi, beto ke na kivuvu ti lukutakanu yayi ke vwanda na mpamba ve. Mu me kwisa na beno, ya kulemba, na laka ya kulwala, mugudi me kuzwa mwa, na . . .

<sup>7</sup> Mu me katuka na Tucson kisika ya kele mbote mpenza mpe ya kuyuma, mpe mu me kwisa awa mpe ya kele kieleka mbote mpe ya ke madidi, na yawu ya kele mwa luswaswanu. Kana beno nionso kuzwa masa nionso ya awa, kana beno lenda kaka tinda yawu na lweka ya beto, beto ke sepela na yawu. Kasi beno lenda sala yawu ve, ya kieleka.

<sup>8</sup> Kasi mu ke tuba na beno kima mosi, ya kele na kingana kuna. Bima ya beto—ya beto—ya beto nionso na Arizona, bayinti ya beto, ya kele ya kifuluka na bansende. Nionso kele na bansende. Ya kele samu ti ya ke ya kuyuma. Ntangu yayi kana yinti yina mosi kumena na lweka awa, ya ke vwanda na matiti ya mbote ya kitoko. Beno me mona, ya kele na masa ve, kikuma yawu yina ya ke na bansende.

<sup>9</sup> Mpe ntangu dibuundu ke kondwa Masa ya Luzingu, yawu ke kuyuma mpe ke tsokota, mpe, ke tsokota mpe ke tatika na nyonso. Kasi kisika bamasa ya Luzingu ke lutaka, yawu ke zibula dititi mpe ke kumisa yawu pete-pete, ya mubisu mpe ya lembami, ya santu mpe yina ba ke ndima na Nzambi. Na yawu bika ti Mfumu Nzambi kutula beto masa, na nkokila yayi, samu ti beto kuvwanda na bansende ve; kasi beto kuvwanda matiti ya mbote yina ti bantu ya kukolama lendaka vwanda na nsi ya yinti ya madidi ya beto mpe kuzwa kupema ya mioyo ya bawu.

<sup>10</sup> Ntangu yayi mu zola kubaka dilongi, na nkokila yayi, kana Mfumu me zola, mpe mu ke na kubenda mwa micro yayi pene-pene ya munu mutindu mu lenda, samu na kukondwa ya ndinga. Mu zola, katuka na lutangu awa ya Hebreux 1:1, mu zola kubaka dilongi: *Nzambi Ke Na Kukitalisa Yandi Mosi Na Bidimbu Ya Yandi*. Bika mu vutukila yawu diaka, samu ti biwidi yayi ya ndinga kele mbote ve awa. Nzambi ke kukitalisa Yandi mosi na bidimbu ya Yandi.

<sup>11</sup> Ntangu yayi, bima mingi ke talisamaka na bidimbu ya yawu. Mpe mu ke na mwa Masonuku awa yina mu zola . . . mpe noti

mosi, yina mu ke zolaka kubaka. Ntangu yayi, kidimbu ya konso kima ke talisaka yina yawu kele.

<sup>12</sup> Ntangu yayi, mutindu bima nionso na yinza, bafelele ke talisamaka, bambala mingi, na bidimbu ya yawu. Kana ya ke ya kufwanana mingi, mutindu mosi na yankaka, kidimbu ya felele yina ke talisa mutindu felele yina kele. Mpe na baniamya ya mfinda, bambala mingi . . .

<sup>13</sup> Mu—mu kele muzombi. Mpe beno fwana kuzaba kidimbu ya niama yina beno ke na kuzomba, kana ve na bantangu yankaka beno ke vunama mpenza. Mumbandu, Dimeme ya Stone kuna na Colombie Britannique. Mu vwandaka kaka na nsi ya Yukon na automne yayi me luta, ntangu yayi ndambu ya bampangi awa vwandaka na munu, mpe beto vwandaka zomba.

<sup>14</sup> Awa kana beno zaba kusala luswaswanu ve, na yina beno ke na kulandaka dimeme to mbambi, beno ke zaba ve kusala luswaswanu kana beno kele ve muzombi ya mayele mingi. Samu, bawu ke salaka mutindu mosi ya banzila; ba ke lemukaka ntangu ba ke tina. Na yawu beno ke mona mosi ya kutelama ntama, yintu ya yandi ya kubumbama, mpamba ve, beno—beno ke vwanda na mpasi na kusala luswaswanu. Bawu ke monana na ntela ya mutindu mosi; na kitini ya manima, ya ke mpembe, kaka mutindu mosi na mbambi. Ya ke vwanda mpasi mpenza na kuzaba bawu. Kasi bibongo ya yandi ke talisa bidimbu ya yandi, na bibongo ya bawu. Dimeme ke na bibongo ya kubaluka, kasi mbambi ke na bibongo ya kubasika na nganda. Mpe kima yankaka, mbambi lenda mata na zulu mingi ve, samu na kudia.

<sup>15</sup> Na yawu nkombo, ntangu yandi ke tambulaka, mpe, ya kele na kidimbu na kati ya nkombo, mpe dimeme, ti beno fwana kuzaba luswaswanu yina ke na kati ya bawu, ntangu beno kele kuna na zulu, samu ti bawu zole ke zingaka na zulu ya mongo. Beno fwana zaba kusala luswaswanu. Kasi kana beno tala, nkombo ke bendaka fioti dikulu ntangu yandi ke tambulaka; kasi, dimeme ke tulaka dikulu ya yandi na nsi mutindu *yayi*, ntangu yandi ke tambulaka. Kidimbu ya yandi kele mutindu yandi ke bikaka nzila ya yandi. Beno ke zaba niama ya beno na nzila ya bidimbu ya yawu, mpe mutindu yawu ke salaka, mpe yina yawu ke kudiaka, mpe nyonso yina. Ya ke kukitalisa yawu mosi na kidimbu ya yawu. Mpe diaka ntangu beno ke pamusa mosi, mpe beno tala mbote yina ke salama, beno lenda zaba bawu na mutindu ba ke kutina. Beno lenda zaba bawu na kidimbu ya konso niama.

<sup>16</sup> Na yawu beno me talaka ntete, mu zaba ve kana beno kele na bawu awa to ve, ba ndeke yayi ya jaune; mbote, pic flamboyant kele kieleka nkumbu ya bawu, mpe ndeke yayi geai. Ndeke yayi geai ke monana na nene mutindu mosi na ndeke yayi ya jaune. Mpe ntangu beno ke mona bawu zole kupumbuka, bawu zole ke monanaka ndeke ya mutindu mosi. Kana beno lenda ve kumona

ntinta, kasi beno tala bawu mbote, beno ke zaba nani kele ndeke yayi ya jaune. Ndeke yayi geai ke pumbukaka, keba ve, na kukwendaka na ntwala. Kasi bruant jaune, ke bulaka mapapu ya yandi; na yina yandi ke na kubula mapapu ya yandi, yandi ke kulumuka mpe ke mata diaka, ke kulumuka mpe ke mata diaka. Beno me mona, ya ke kwendaka, mutindu *yina*, mpe beno lenda zaba ti yayi kele kidimbu ya ndeke ya jaune, na mutindu ya yandi ya kupumbuka.

<sup>17</sup> Kana beno tala ndeke yayi caille ntangu yandi ke basikaka, mutindu yandi ke pumbukaka. Na yawu beno tala kana beno ke na kiziba, kisika yina ndeke yayi caille ke vwanda, mpe ndeke yayi *bécassine*. Beno bazombi kuzaba yawu. *Bécassine* ya Wilson mpe *bécassine* yina ya fioti mingi, bawu ke zabanaka na mutindu ya bawu ya kubasika mpe mutindu ya bawu ya kukwenda. Bawu ke zabanaka na mutindu ya bawu ya kupumbuka, ti wapi mutindu ya ndeke bawu kele. Samu na yawu, kana beno kuwa bawu, beno lenda zaba yina ya kele, mutindu yandi ke basika, yawu yina ya kele, na mutindu ya yandi ya kupumbuka.

<sup>18</sup> Mutindu bakala mpe kento. Bawu zole kele bantu, kasi kento ke na bidimbu ya luswaswanu na bakala. Mu vwandaka tanga awa, na mwa ntangu fioti me luta, na yina me tala Salomon na ntinu ya kento. Mu me longaka na beno ntete ve, mwa Nsangu ya munu awa, na yina me tala ntinu ya kento ya Sude, yina kwisaka kumona Salomon, mpe monaka dikabu yango ya kuswasikisa mabanza ya ntima. Mu vwandaka tanga disolo yango, ntama mingi ve awa, mpe ba me tuba, ti, “Mosi ya bingana yina ba pesaka ntete na Salomon, ya vwandaka, ntinu yayi ya kento nataka kento mosi, to bakento, na yawu, mpe ya lwatisaka bawu mutindu babakala.”

<sup>19</sup> Ntangu yayi, ya vwandaka salama ve na kilumbu yina, kasi ya kieleka ya ke na kusalama, bubu yayi. Mpe—mpe beno zaba ti ya kele mbote ve. Biblia me tuba ti kento lendaka sala yawu ve. “Ya kele ya busafu samu na kento na kulwata lele ya bakala.” Mpe Nzambi yina ke sobaka ve tubaka yawu, na yawu ya kele kieleka.

<sup>20</sup> Na yawu beto ke bakula ti Salomon, na kutalaka bawu kaka, yandi salaka ti bawu kutambula to bawu kusala kima mosi, mpe na mbala mosi yandi tubaka, “Ba ke bakento.” Beno me mona, yandi zabaka yawu na nzila ya bidimbu ya kento yina, na mutindu ya kutambula ya yandi, ti yandi vwandaka kento kasi bakala ve.

<sup>21</sup> Mpe kuna mingi ya bima kele mutindu yina, ya kele na bidimbu ya yawu. Kaka mutindu bantu mingi ke vwandaka ya diboko ya kikento, mpe ya diboko ya kibakala. Bawu ke zabanaka na mutindu ya bawu ya kusala. Beno lenda zaba kana ya kele muntu ya diboko ya kibakala to muntu ya diboko ya

kikento, na mutindu ya bawu ya kusala, mutindu ba ke salaka ntangu nionso na diboko yina ya kikento to na diboko ya bakala.

Mpe beno bambuka moyo ti, Yesu vwandaka na diambu ya mutindu yina, ti . . .

<sup>22</sup> Maboko zole kele kaka . . . Ya kele mutindu mosi. Ba kele na kidimbu ya nene ya mutindu mosi, bidimbu ya misapi, misapi tanu; musapi ya fyoti, musapi ya zole, mpe nyonso yina. Kaka mutindu diboko ya kibakala mpe diboko ya kikento ke na misapi ya mutindu mosi, na kutala mbote, diboko kitezo mosi, ya ke mutindu mosi mpenza. Mpe luswaswanu yina kele kaka, na kati ya bawu, ya kele ti mosi kele ya kikento mpe yankaka kele ya kibakala. Ya kele kaka na luswaswanu yina beno lenda mona. Mosi kele ya kikento, yankaka kele ya kibakala.

<sup>23</sup> Na yawu kuna, Yesu tubaka . . . Mu zola tuba diambu mosi awa. Yesu tubaka, na Matthieu 24, ti, “Bidimbu ya Mpeve ke fwanana na bilumbu ya nsuka, ya ke vwanda pene-pene mingi ti ya lendaka vuna bayina soolamaka na ntete kana yawu lenda salama.” Beno me mona, bawu lenda kaka . . .

<sup>24</sup> Beno baka diboko ya beno mpe beno telemisa yawu na zulu. Beno me mona, kana beno tala mbote ve, mosi ke fwanana na yankaka, na mutindu nyonso, kasi mosi ya bawu kele ya kikento mpe yankaka kele ya kibakala.

<sup>25</sup> Ya kele mutindu bampeve kele na kilumbu ya nsuka. Ba ke ya kufwanana, kasi bawu ke zabana na bidimbu ya bawu. Mosi kele ya mbote, mpe yankaka kele ya yimbi, mpe ya lenda zabana na kidimbu ya yawu.

<sup>26</sup> Mpeve ya Nzambi lenda zabana na nzila ya kidimbu ya Yawu. Beno me mona? Mpeve ya Nzambi, mpe mpeve ya dibuundu. Ya kele na mpeve ya dibuundu, mpe Mpeve ya Nzambi yina ke ata fioti ve mutindu mosi ve na mpeve ya dibuundu, na mutindu nionso.

Ya ke na mpeve ya dénomination.

<sup>27</sup> Ya ke na mpeve ya yinsi. Yinsi ke na mpeve ya yawu. Konso yinsi, ntangu mu ke kwendaka, beno ke tambula kuna, beno ke mona mpeve ya mutindu yankaka. Mu kwendaka na Finlande, bantu ya mbote, kasi ya vwandaka na mpeve ya Finlande. Mu kumaka kuna na Allemagne, ya ke na mpeve ya Allemagne.

<sup>28</sup> Awa ntama mingi ve, mu vwandaka tambula na kento ya munu, ntangu beto vwandaka zinga na Indiana, mwa bamvula zole to tatu me luta, kuna na mwa supermarché mosi. Mu katukaka na kukuma na yinzo. Beto kwendaka sosa mwa madia. Mpe kuna na nzila, beto . . . Ya vwandaka na été, beno lendaka ndima yawu ve, kasi beto monaka kento mosi me lwata robe. Mpe ya vwandaka ya ngitukulu mingi, mu . . . Ya nyongisaka munu. Mu—mu tubaka, “Tala kuna, ya ke yitukisa, kento yina kele me lwata robe.” Bayankaka na kati ya bawu vwandaka me lwata

bilele yina vwandaka ve. . . yina me lunga ve samu na kento. Mpe—mpe yandi tubaka. . . Mu tubaka, “Mbote, yina ke kaka mpeve ya Amerique, beno me mona, mpeve ya Amerique.”

<sup>29</sup> Ntangu yayi, mpeve ya Amerique, ya ke. . . ya ke monana ti ya ke yinsi ya Balisto, kasi mpeve ya yinsi yayi kele ya Baklisto ve. Ba lenda bokila yawu yinsi ya Baklisto, ya ke na ba-million ya ba-kilometre na yawu, na bidimbu. Na yawu, kento yayi, mu tubaka. . .

Yandi tubaka, “Mbote, beto ke bantu ya Amerique ve?”

<sup>30</sup> Mu tubaka, mu tubaka, “Ve. Beto ke zingaka awa. Yayi kele yinsi ya beto. Beto—beto—beto ke vwandaka awa. Beto zola yawu. Ya kele yinsi ya kulutila mbote na yinza. Kasi, dyaka, beto kele bantu ya Amerique ve.” Mu tubaka, “Beto butukaka na Zulu. Mpeve-Santu me kulumuka, mpe beto kele ya Kimfumu mosi. Ya kele ya yinza yayi ve.” Mu tubaka, “Ya kele samu na yina ti bampangi ya beto ya bakento ke lwataka ba-robe, ba ke vwandaka na bansuki ya yinda, ba ke tulaka maquillage ve. Beno me mona, bidimbu ya bawu ke zabikisa bawu mutindu ‘ya busantu na Mfumu,’ yina me katuka na Zulu.”

<sup>31</sup> Na yina, beto ke na kusosaka Kimfumu mosi. Beto ke na kusosaka Ntinu mosi kukwisa samu na kunata bantu ya Yandi na Kimfumu ya Yandi. Mpe bawu ke zabana na nzila ya bidimbu ya bawu—ya bawu, ti bimvwama ya bawu ke ya ntoto yayi ve to ya yinsi yayi. Ya ke ya zulu, na Nkembo. Samu na yina, bawu, “Bawu ke na kusosaka Mbanza Yina Mutungi mpe Musadi kele Nzambi.” Ba me zabana mbote-mbote.

<sup>32</sup> Kana mu vwandaka na ndinga ya kulunga na kulonga na beno mpimpa mosi. Kasi mu—mu fwana vwanda ntama na yawu. Ntangu yayi, ya me zabana na bidimbu ya yawu.

<sup>33</sup> Beto ke mona mbandu ya mbote awa na ntangu ya Israel, ntangu bawu kotaka na ntoto ya nsilulu. Mpe Nzambi bokilaka bawu kulandila nsilulu ya Yandi. Yandi tubaka na Abraham ti, Yandi ke. . . nkuna ya yandi ke vwanda na yinsi ya nzenza, bampula nkama yiya, mpe na manima Yandi ke katula yandi na kimpika na diboko ya nene ya ngolo, mpe ti bawu ke kwenda na ntoto, kuna, yina ba silaka, kuna miliki na bwiki ke vwandaka ya kufuluka. Mpe na yina ntangu ya nsilulu kumaka pene-pene, Pharaon mosi kwisaka yina zabaka ve kosalu yina ya nene Joseph vwandaka na yawu na kati ya bawu.

<sup>34</sup> Mpe, na yayi, Nzambi telemisaka profete mosi na nkumbu ya Moise. Mpe bakala yayi kuzwaka ndwenga nyonso ya bantu ya Egypte. Na ntembe ve ti yandi vwandaka bakala mosi ya nene, ya mayele mingi, ya kulonguka, samu ti yandi lendaka kulongisa bantu ya ndwenga ya Egypte. Na kutala mutindu ya muntu ya ku—kufwana samu na kuvuukisa.

<sup>35</sup> Kasi, beno me mona, yina beto ke bokilaka kuvuukisa, mpe yina Nzambi ke bokilaka kuvuukisa, ya ke na luswaswanu.

<sup>36</sup> Ntangu yayi beno tala mbote bakala yayi na bumuntu ya yandi nionso. Yandi zabaka ti yandi butukaka samu na kuvuukisa bana ya Israel. Dyaka, na mayele ya yandi nyonso ya lukolo, yawu yina nyonso yandi zabaka, mpe yandi zabaka ti Nzambi bokilaka yandi na kusala kisalu yango, yandi vwandaka na nyonso ya yandi. . . Yandi vwandaka na Licence na Lettre, mpe Doctorat ya yandi na Philosophie, mpe Doctorat na Droit, mpe nyonso yina. Mpe yandi kwendaka samu na kuvuukisa Israel, mpe yandi kubwaka na nyonso.

<sup>37</sup> Ntangu yayi beno tala, ya vwandaka monika mutindu ti, yandi yina vwandaka dikulu mosi na kiti ya kimfumu na Egypte, samu na kukuma Pharaon, ti yandi lendaka vuukisa bana ya Israel kana yandi me kuma Pharaon, samu ti yandi vwandaka yina vwandaka landa na ndonga na kuvwanda na kiti ya kimfumu. Kasi, beno me mona, ti, na kusalaka mutindu yina, ya zolaka talisa ve kidimbu ya Nzambi na kuvuukisa bantu ya Yandi.

<sup>38</sup> Yandi tubaka ti Yandi ke vuukisa bawu. *Yandi* ke “vuukisa bawu na diboko ya ngolo,” Moise ve ya nkonga ya basoda, kasi Nzambi na diboko ya ngolo.

<sup>39</sup> Beto zaba ti profete yayi kutinaka mpe kwendaka na ntoto ya kuyuma bamvula makumi yiya. Ya bakaka bamvula makumi yiya na Pharaon samu na kukotisa yandi mayele ya lukolo, mpe Nzambi bakaka bamvula makumi yiya samu na kubasisa yandi yawu. Na yawu beto ke mona ti, kilumbu mosi, ti yandi, na manima ya ntoto ya kuyuma, yandi kutanaka na Mfumu Nzambi na mulaka ya tiya, na mutindu ya Dikunzi ya Tiya kuna na divunda. Mpe ba lombaka na yandi na kukatula basapatu ya yandi, ti, ntoto yina yandi vwandaka ya kutelama vwandaka ya santu. Ntangu yayi beno tala bakala yayi ya mbote, ya kulonguka, ya mayele mingi, yawu yina ya vwandaka, beno tala mbote kusoba ya bidimbu ya yandi na manima yandi kutanaka na Nzambi. Yandi salaka kima ya kulutila. . .

<sup>40</sup> Bambala mingi Nzambi ke salaka mambu na mutindu kukondwa mpasi, mpe na mutindu mosi ya bulawu, na mutindu ya mabanza ya kimuntu. Beno tala bakala yina me lembana nyonso; na bankonga ya makesa nyonso ya Egypte mpe bima nyonso pene-pene ya yandi samu na kusala luzolo ya Nzambi, na mayele ya yandi nyonso ya lukolo, na bamvula makumi yiya, na buntwenya ya yandi. Yandi yayi, bamvula makumi nana, na suka yina landaka, na kento ya yandi ya kuvwanda na zulu ya mpunda mosi, na mwana na luketo ya yandi, mpe na nkawa na diboko ya yandi, ke kwenda na Egypte, samu na kununga. Beno ke tuba ve ti yayi buzoba mpenza! Kasi yina vwandaka talisa bidimbu ya Nzambi, samu ti Yandi vwandaka na muntu yina ke kwikila Ndinga ya Yandi. Yimani. Dyambu vwandaka ti, beno lenda banza ti muntu mosi kukwenda kuyala na Egypte, kisika, makesa me lembanaka? Kasi yinki ya vwandaka? Kidimbu ya

yandi, tikitaki ya yandi kusobaka. Yandi vwandaka kwenda na Nkumbu ya Mfumu, “MU KELE YINA KELE.” Dyambu vwandaka ti, yandi nungaka. Yandi salaka yawu, samu ti yandi vwandaka kwenda na Ngolo ya Mfumu.

<sup>41</sup> Ntangu ya vwandaka kwenda, na kutwadisaka Israel na ntoto ya nsilulu, yandi kotaka na ngwisani na mpangi ya yandi ya bakala, mpangi ya yandi ya dénomination, Moab. Ntangu yayi, Moab, ya zola tuba ve ti, bawu vwandaka mimpani. Bawu vwandaka bana ya mwana ya Lot ya kento. Mosi ya bana ya bawu kubutaka—kubutaka Moab.

<sup>42</sup> Ntangu yayi, kuna, mu zola ti beno tala bayinsi yayi zole, na mutindu yankaka. Awa vwandaka Egypte, mwa nkonga ya bantu, ya kupanzanaka, yina vwandaka na yinsi ve ya kukwenda, yina vwandaka na bamfumu ve to ntinu ve, to kima ve, to yina vwandaka na bantu ya nene ve na kati ya bawu, kaka bantu yina vwandaka kwenda na ntoto ya kuyuma. Mpe awa ya lombaka ti bawu kuluta na ntoto ya Moab. Ya vwandaka mpenza na nzila ya nsilulu.

<sup>43</sup> Mpe Moab, mpe, vwandaka kwikila na Yehovah, mpe bawu vwandaka na profete. Mpe Israel vwandaka na profete. Bawu zole vwandaka na baprofete.

<sup>44</sup> Mpe ntangu yayi beno tala, bawu kumaka na kisika yina profete ya yinsi yayi ya organisation kulumukaka samu na kusinga profete ya yinsi yayi yankaka, samu ti bawu vwandaka yenga-yenga, bawu vwandaka ve na kisika ya kuvwanda. Na yawu bawu kumaka kuna.

Mpe beno tala mbote baprofete yayi zole: Kana beto tala na mutindu ya kisina, bawu zole vwandaka ya kusungama. Samu, beno tala, Balaam, évêque, tubaka na yandi, “Ntangu yayi, tungila munu ba-autel sambwadi.”

<sup>45</sup> Sambwadi ntalu ya kulunga ya Nzambi, yina ke talisa Bansungi Sambwadi ya Dibuundu, bilumbu sambwadi ya ngidikulu, nyonso yina. Ntangu yayi, sambwadi, Nzambi kele ya kulunga na sambwadi.

<sup>46</sup> “Ba-autel sambwadi, mpe tula na zulu ya konso autel ngombe ya bakala.” Ntangu yayi yina vwandaka mpenza autel ya mutindu mosi yina ba vwandaka na lweka ya Israel. Kuna na Israel, bawu vwandaka awa na mutindu mosi ya autel; mpe munkayulu ya mutindu mosi, ngombe ya bakala mpe ngombe ya bakala; profete mpe profete. Bayinsi zole, ya luswaswanu.

<sup>47</sup> Mbandu mosi ya kulunga na kilumbu yayi beto ke na kuzinga, kana beto vwandaka na ntangu ya kuzonzila yawu. Beno tala, Nzambi salaka yayi na kingana, samu ti beto kumona yawu, na kufwanikisaka yawu zole.

<sup>48</sup> Ntangu yayi, mpe, Balaam kulombaka ti bawu tula na konso autel nkombo ya bakala. Ya vwandaka talisa lukwikilu



ya yandi na kwizulu ya Mesiya. Nkombo ya bakala, dimeme ya bakala, ya vwandaka munkayulu ya mutindu mosi na yina bawu vwandaka na yawu na Israel; kuna na lweka ya Israel, awa na . . . na Moab. . . Na mutindu ya kisina, bawu zole vwandaka ya kusungama, kasi, beno tala, na kulandila malongi ya kisina.

<sup>49</sup> Kasi profete mosi kuna na camp ya Israel vwandaka na bidimbu ya Nzambi mpe Ndinga ya Nzambi. Yandi vwandaka ya kukangama na nsilulu ya Nzambi ya nsungi yina, samu yandi vwandaka na nzila yina vwandaka nata na ntoto ya nsilulu. Beno me mona?

<sup>50</sup> Ntangu yayi, na kulandila na lweka ya kisina, Balaam, Balak zolaka zabana kaka mutindu Moise vwandaka.

<sup>51</sup> Kasi, beno me mona, Moise, vwandaka profete ya kieleka ya Nzambi, na kulandila kaka mambu ya kisina ve, kasi yandi vwandaka na kutalisama ya Nzambi. Beno me mona, yandi vwandaka na nzila ya ksalu, kieleka yina vwandaka nsilulu ya nsungi yina; ya nsungi ya Noe ve, kasi ya nsungi ya yandi. “Mu ke nata beno na ntoto ke na miliki na bwiki ya kifuluka.” Bawu vwandaka na nzila ya bawu, mpe Israel kuzabanaka na profete ya bawu, Moise, na Nsangu ya nsungi yina. Bidimbu ya Nzambi kutalisamaka na Moise. Dikunzi ya Tiya vwandaka landa yandi. Yandi vwandaka mpe na lemvo ya masumu na ksalu; kuzonzila yawu kaka ve, kasi ya vwandaka na ksalu. Ya kele ve yina ke vwanda; yina ya ntangu yayi!

<sup>52</sup> Beno tala, yandi vwandaka na nyoka ya kisengo yina ba telemisaka samu na bimbevo mpe maladi ya bantu, na yawu Moise vwandaka sadila kubeluka ya Kinzambi. Yandi vwandaka na lemvo ya masumu, na nyoka ya kisengo, yina vwandaka talisa ti Nzambi vwandaka na camp, mpe bantu vwandaka tala na nyoka yina ya kisengo mpe vwandaka beluka.

<sup>53</sup> Yandi vwandaka mpe na Ditadi yina bulamaka ke landa yandi. Mpe yina vwandaka talisa Nzambi, na kubumba Bamasa ya Luzingu na kati ya bawu, kyese mpe mpulusu, ti bawu ke kufwa ve kasi bawu ke kuzwa Luzingu ya seko. Ya vwandaka kifwanusu ya . . . Ditadi yina kubulamaka na ntoto ya kuyuma vwandaka kifwanusu ya Klisto yina ke bulama.

<sup>54</sup> Na yawu, bawu vwandaka zyeta na nzila ya nsilulu. Yina vwandaka kutalisama yankaka, samu na kutalisa kidimbu ya Nzambi. Ata ti na mutindu ya kisina yayi yankaka vwandaka na ya Ndinga; yandi vwandaka na mambu ya kisina, na kutalisama, mpe kidimbu ya Nzambi na kati ya bawu. Nzambi me talisama Yandi mosi. Baprofete zole, bawu zole baprofete, mpe bawu zole na mambu ya kisina; kasi Nzambi talisamaka na bidimbu ya Yandi na kati ya Moise, samu ti yandi vwandaka na bidimbu ya Nzambi na yandi.

<sup>55</sup> Awa, dyaka, bidimbu ya Nzambi kele ntangu nionso ya mazulu, samu Yandi ke ya mazulu. Nzambi kele ya mazulu. Ya

ke ya mumesanu ve, ntangu nionso, na kulandila mutindu ya mabanza ya mambu ya bilumbu yayi. Beno zaba yawu. Nzambi ke balulaka mambu ntangu nyonso, samu—samu na nkonga ya misambidi na konso nsungi yina me lutaka.

<sup>56</sup> Mpe ata ntangu mosi ve ti muntu to kimvuka mosi ya bantu me salaka bawu mosi organisation kintwadi na nsangu kukondwa bawu kufwa ve mpe bawu kukwenda na fulu, mpe ba ke telama diaka ata fioti ve. Ya ke na kati ya masolo ve. Ba-Lutherien, ba-Presbyterien, ba-Methodiste, ba-Baptiste, baya Pantekote, mpe nyonso yina, bawu kutelamaka dyaka ata fioti ve, ntangu bawu salaka Yawu diambu ya kimvuka.

Nzambi ke salaka na bantu.

<sup>57</sup> Beno tala, Yandi ke mpenza ya mumesanu ve na mutindu ya kubanza. Beno me mona, beto ke landa ya ntangu yayi, mpe beto fwana kukwikila Yawu mutindu *yayi*. Na yawu Nzambi ke kwisa na Ndinga ya Yandi yina Yandi silaka, mpe ke zabana Yandi mosi na Ndinga yango. Nkonga *yayi* lenda kwenda ve na Yawu, samu ti ya ke kwikilaka Yawu ve. Beno me mona, yawu me zengana yawu mosi na Yawu.

<sup>58</sup> Mutindu Joseph, yandi vwandaka mwana ya David, mpe muntu ya mbote, Joseph bakala ya Marie. Yandi vwandaka muntu ya mbote, mpe na ntembe ve ti yandi vwandaka tangaka Biblia, buku, ntangu nionso, samu . . . mpe vwandaka vingila Mesiya kukwisa, na yawu yandi zolaka zaba yina Masonuku tubaka ti zolaka salama. Esaie tubaka ti, “Mwense ke kuzwa kivumu.”

<sup>59</sup> Mbote, ntangu yayi, yandi vwandaka basika na ntwenya yayi ya kento, Marie, mu banza ya vwandaka na bamvula kumi na nana, mpe yandi vwandaka mu banza na bamvula mwa mingi. Na yawu ntangu bawu bakaka lukanu ya kukwelana, yandi kumaka na kivumu. Ntangu yayi yina vwandaka mwa mpasi mingi samu na Joseph na kundima yawu. Na ntembe ve ti Marie tubaka na yandi samu kumonana ya Gabriel. Kasi beto zaba ti, mutindu kikalulu ya yandi vwandaka twadisa yandi, yandi tulaka na yawu ntembe.

<sup>60</sup> Awa yandi kuzwaka kivumu na ntwala bawu kwelana. Mpe, na Biblia, kitumbu ya yawu kele lufwa, na nzila ya kulosa matadi. Kento yina me kwelaka ve me kuzwa kivumu, ba fwana losa yandi matadi. Ya vwandaka na kindumba ve na Israel. Ba mangaka yawu. Na yawu beto ke mona ti, na Deuteronome, yawu ke tuba na beto mutindu yina.

<sup>61</sup> Awa beto ke mona ti, Marie, ya ke monika mutindu ti yandi vwanda zola kusala kaka Joseph kiswamunu ya dyambu yina yandi salaka. Samu ti, kana ba zabaka ti yandi kuzwaka dezia kivumu na ntwala bawu kukwelana, na yawu ba fwanaka losa yandi matadi, mpe yandi fwanaka kuzwa muntu yina zolaka vwanda mutindu kiswamunu samu na yandi. Mpe ya vwandaka

monika, na mutindu nyonso, mutindu yandi vwandaka zola ti yawu kusalama.

<sup>62</sup> Kasi Joseph na kutalaka yandi na meso ya yandi ya nene ya kitoko, mpe ya lendaka tuba, “Joseph, Gabriel me tuba na munu ti, ‘Mpeve-Santu ke kufika nge, mpe Mwana yayi nge me—nge me kuzwa kele ya Mpeve-Santu. Ya kele Nzambi. Ya kele mutindu yayi ba ke bokila Yawu, “Mwana ya Nzambi.”” Mpe, Joseph, yandi—yandi—yandi zolaka kwikila yawu, kasi yawu vwandaka ya mumesanu ve. Ya me salamaka ata fioti ve na ntwala.

<sup>63</sup> Mpe ya kele kaka mutindu mosi bubu yayi. Kana beto lenda kaka . . . Kana mu vwandaka na mutindu ya kunata bantu na kumona kima yina ke ya mumesanu ve na mutindu nionso, kana ya me zabana na nzila ya Ndinga, na yawu bidimbu ya yawu ke siamisa yina yawu kele. Ya ke Nzambi na kisalu.

<sup>64</sup> Joseph zolaka zaba yawu. Yandi zolaka zaba ti, “Mwense ke kuzwa kivumu.” Kasi yandi vwandaka ya kusungama samu na yawu. Yandi zolaka ve kufwa makwela na yandi, na kinsweki, kasi yandi—yandi vwandaka banza na kusala yawu.

<sup>65</sup> Na yawu Wanzio ya Mfumu monikaka na yandi na ndosi. Beno me kukiyufulaka ntete samu na yinki Yandi monikaka na ndosi? Ya vwandaka ve na bapofete na bilumbu ya bawu. Ndosu ya bawu vwandaka kukondwa mpasi, ya vwandaka na nsatu ya ntendulu ve. Yandi tubaka, “Joseph, nge mwana ya David, kuvwanda na boma ve na kubaka Marie kento ya nge, samu ti kivumu yina yandi me kuzwa kele ya Mpeve-Santu.” Beno me mona, na yawu, yina sukisaka yawu. Beno me mona, Yandi kwisaka na yandi na ndosi, na nzila ya zole. Kasi, beno me mona, ya vwandaka ve na profete kuna samu na kuzaba Ndinga yango, ti, “Yayi kele mwense yina ke kuzwa kivumu.” Beno me mona? Na yawu, kuna, Yandi kumonikaka na yandi na ndosi, samu ti yandi vwandaka muntu ya kusungama mpe ya kieleka mpe ya mbote.

<sup>66</sup> Mpe mu ke kwikila ti Nzambi ke kwisa na muntu nyonso ya mbote, na mutindu mosi to yankaka, mpe ke talisa bisalu ya Yandi na muntu yina ya mbote, samu na nsungi yina, kana Nzambi me bokila muntu yina samu na nsungi yina.

<sup>67</sup> Ntangu yayi, kasi ya vwandaka ya mumesanu ve, ti bawu lendaka bakula yawu ve. Kasi, konso ntangu, kumonika na kulandila nsilulu ya Ndinga samu na nsungi yayango, bima yayi nyonso ke vwandaka ya mumesanu ve.

Ntangu yayi ya kele na bantu yankaka yina lendaka kwenda bisika nionso, mpe kutuba, “Mbote, *yayi* ke ya mumesanu ve, ya kele Nzambi. *Yayi* ke ya mumesanu ve.”

<sup>68</sup> Kasi, beno me mona, ya fwana kuzabakana na nzila ya Ndinga, mpe Ndinga kele Nzambi. Beno me mona? Na yawu kidimbu ya kutalisama yayi ke zabikisa nani ya kele, samu ti Nzambi ke tuba, “*Yayi* ke salama,” mpe yawu ke salama. Beno

me mona? Kidimbu ya yawu kele Ndinga ya Nzambi yina me zabana na nzila ya kidimbu ya yina ke salama.

<sup>69</sup> Yandi tubaka na bilumbu ya nsuka ti Yandi ke mwangisa Mpeve-Santu. Yandi me sala yawu. Bidimbu ya yawu me talisa ti ya vwandaka Nzambi, Ndinga ya Yandi ya nsilulu. Beno me mona, yawu ke zabana yawu mosi ntangu nionso.

<sup>70</sup> Ntangu yayi, ntangu nionso, konso ntangu, yawu ke sungikaka ndinga, ntangu ba me zonza Ndinga yimbi. Beno me monaka yawu ntete? Ya vwandaka mutindu yina na bilumbu ya Noé, ya sungikaka nsungi yina ya mayele, ti Nzambi ke kulumusa masa na zulu. Ya vwandaka Moise, beno me mona, yina sungikaka bawu ntangu bawu vwandaka kuna na Egypte, mpe nyonso yina, kasi Ndinga ya Nzambi zolaka talisama. Mpe Kieleka ya Ndinga sungikaka kifu.

<sup>71</sup> Beno bika mu yufula beno kima mosi. Beto lenda timuna fyoti awa. Mu zola longa malongi ve to malongi, kasi beno bika mu yufula beno kima mosi.

<sup>72</sup> Yesu vwandaka Ndinga. Beto zaba yawu. Biblia me tuba yawu. Santu Jean, na kapu ya 1, “Na mbandukulu vwandaka Ndinga, mpe Ndinga vwandaka na Nzambi, mpe Ndinga vwandaka Nzambi. Mpe Ndinga kumaka muntu mpe zingaka kati ya beto.” Yandi kele kaka Ndinga. Kuna ntangu Yandi zabaka mabanza ya bawu, bawu zolaka zaba ti ya vwandaka Ndinga, samu ti Ndinga ya Nzambi ke tuba ti ya kele yina Yandi zolaka sala. Yandi vwandaka Profete.

<sup>73</sup> Ntangu yayi beno tala, beto zaba ti ntangu Yandi butukaka, pene ya bamvula kumi na zole, Yandi kwendaka na mukembo ya tabernacle. Mpe bawu mataka kuna samu na Pake. Mpe, na nzila ya bawu ya kuvutuka, bawu zyetaka bilumbu tatu mpe bawu zimbanaka Yandi; bawu talaka, banzaka, to, kuzwaka dibanza ti Yandi vwandaka na kati ya bawu.

<sup>74</sup> Beto lenda basisa dilongi mosi na yawu. Ya ke salama mingi bubu yayi! Ntangu yayi beno ba-Methodiste, ba-Baptiste, ba-Presbyterien, ba-Lutherien, bantu ya Catholique, nyonso yina beno kele, beno me mona, beno ke na kusalaka kima ya mutindu mosi. Beno ke na kubanza ti samu Wesley kuzwaka reveil mosi ya nene, Luther kuzwaka reveil mosi ya nene, to Pantecote kuzwaka reveil mosi ya nene, beno ke na kubanza ti Yandi kele na kati ya bantu, na yina, ntangu yankaka Yandi ke kuna ve.

<sup>75</sup> Bawu kwendaka sosa Yandi. Wapi kisika bawu kuzwaka Yandi? Kisika bawu bikaka Yandi, na Jerusalem. Mpe ntangu bawu kuzwaka Yandi, yinki Yandi vwandaka sala? Mwana-bakala ya fioti, ya bamvula kumi na zole, na kutala yina kwendaka ata mbala mosi ve na lukolo na nganda ya yina mama ya Yandi longaka Yandi; mpe awa Yandi vwandaka na tempelo, ya vwandaka solula na banganga-Nzambi, na yina me tala Ndinga ya Nzambi. Mpe bawu vwandaka yituka na ndwenga

ya Mwana yayi. Samu na yinki? Yandi vwandaka Ndinga. Beno tala ntangu yayi.

<sup>76</sup> Mpe ntangu yayi ya ke kukondwa luzitu ve na bantu ya Catholique yina ke bokilaka Marie mama ya Nzambi, kasi beno bika ntete mu talisa na beno mwa kifu mosi awa. Kana dibuundu me tungama na zulu ya Marie, beno tala mbote yina salamaka. Ntangu yayi yandi kwisaka mpe yandi tubaka, “Oh, tata ya Nge na munu vwandaka sosa Nge, na kudila.” Beno tala mbote nzonzolo yina, na yawu yandi fundisaka kimbangi ya yandi mosi. Yandi tubaka, “Tata ya Nge na munu vwandaka sosa Nge, na kudila.”

<sup>77</sup> Beno tala mbote Ndinga yina. Yandi vwandaka Ndinga. Yandi tubaka, “Beno zaba ve ti Mu fwana sala bisalu ya Tata ya Munu?” Beno tala mbote Ndinga ke sungikaka kifu. Kaka kuna na ntuala ya banganga-Nzambi yina, yandi bebisaka kimbangi ya yandi. Yandi tubaka ti yandi kuzwaka kivumu na nzila ya Mpeve-Santu, mpe awa yandi tubaka ti Joseph kele “tata” ya Yandi. Beno me mona Ndinga yina sungikaka yawu na nswalu nionso? Yandi vwandaka Ndinga. Ntangu yayi, beno zaba ti mwana-bakala ya bamvula kumi na zole lendaka sala yawu ve. Yandi vwandaka Ndinga. Yandi vwandaka Ndinga me tubama na nsungi yina, na yawu kuna kutalisama ya kidimbu ya Nzambi vwandaka na kati ya Klisto. Yandi sungikaka bifu. Yandi tubaka . . .

Bawu tubaka, “Kasi, beto kele bilandi ya Moise.” Beno me mona?

<sup>78</sup> Yandi tubaka, “Kana beno vwandaka bilandi ya Moise, beno zolaka zaba Munu. Yandi sonikaka samu na Munu. Moise tubaka, ‘Mfumu Nzambi ya beno ke telemisa Profete mosi mutindu munu.’ Beno zolaka zaba Munu kana beno zabaka Moise.”

<sup>79</sup> Mpe, beno me mona, Ndinga konso ntangu ke sungikaka kifu ya kilumbu. Kasi bantu ke zolaka ve kukwikila yawu. Bawu ke landilala na kukangama na yawu, mutindu mosi kaka.

<sup>80</sup> Kasi Yesu sungikaka mama ya Yandi mosi. Mpe mama ya Yandi vwandaka na kifu, samu ti yandi tubaka ntete ti yandi kuzwaka kivumu ya Mwana yina na nzila ya Mpeve-Santu, mpe awa yandi me balula kimbangi ya yandi mpe ke tuba ti Joseph vwandaka “tata” ya yandi, ti yandi vwandaka tata ya—ya Yesu. Ntangu yayi kana—kana Joseph . . .

<sup>81</sup> Kana Yandi vwandaka mwana ya Joseph, kana Yandi vwandaka sala bisalu ya tata ya Yandi, Yandi zolaka vwandaka na yinzo ya kimalu ya mabaya.

<sup>82</sup> Kasi Yandi vwandaka sala bisalu ya Tata ya Yandi, kuna na Tempelo, ya vwandaka nganina ba-organisation yina. Beno me mona? Yandi vwandaka sala bisalu ya Tata ya Yandi, kaka

Mwana ya fioti ya bamvula kumi na zole. “Beno zaba ve ti Mu fwana sala bisalu ya Tata ya Munu?”

<sup>83</sup> Beno monaka ntangu Satana mekaka Yesu? Kidimbu ya Yandi kuna, ntangu Yandi vwandaka na mpukumunu ya Yandi, ya talisaka ti Yandi vwandaka Nzambi, samu ti Yandi kangamaka na Ndinga. Beno me mona? “Ya me sonamaka,” Satana tubaka.

Yesu tubaka, “Ya me sonamaka mpe,” ya kangamaka kaka na Ndinga.

<sup>84</sup> “Nzambi, na bambala mingi,” beto me tanga awa. “Nzambi, na bambala mingi,” na bantangu ya ntama, “na bafwaso mingi,” na mitindu mingi, “kuzabanaka Yandi mosi na baprofete ya Yandi na nzila ya ba vision.” Yina vwandaka kidimbu ya profete, ntangu yandi vwandaka zonza mambu na ntwala mpe yawu vwandaka salama. Ntangu yayi yina vwandaka kidimbu ya kutalisama ya yandi, ti Nzambi vwandaka na yandi. Na yawu yina vwandaka pesa yandi muswa ya kutendula Ndinga ya kilumbu yina, samu, “Ndinga ya Nzambi ke kwisaka na baprofete,” kidimbu ya profete, ti Yandi zonzaka na ntwala.

<sup>85</sup> Biblia me tuba, “Kana ya ke na muntu mosi, mpe kana yina yandi me tuba kusalama, na yawu beno kuwa yandi; kasi, kana yawu kusalama ve, beno kwikila yandi ve, beno vwanda na boma ya yandi ve, kasi ya Munu. . . kana—kana Ndinga ya Munu kele ve na kati ya yandi. Kasi kana yawu kusalama, na yawu Ndinga ya Munu kele na kati ya yandi.” Yina kele kutalisama ya yandi. Ya ke kidimbu ya profete.

<sup>86</sup> Ntangu yayi, Nzambi, na bambala mingi, yina kele mutindu Yandi vwandaka talisa bidimbu ya Yandi ya kutalisama ya Yandi na muntu, kuzonza na nzila ya muntu yina ba me bokila samu na kuvwanda profete. Ntangu yayi, Biblia me tuba ti, “Nzambi, na bambala mingi, na bafwaso mingi, vwandaka zonza na batata na nzila ya baprofete.”

<sup>87</sup> Beto me tanga mpe, kuna na Pierre ya Zole, ti Ndinga nyonso ya Nzambi kusunamaka na bawu. “Bantu ya ntama, vwandaka ya kutwadisama na Mpeve-Santu, samu na kusunika Biblia.” Ba vwandaka baprofete. Ndinga kwisaka na bawu mpe bawu sonikaka Yawu, ba sonikaka yawu, na nsi ya lutwadusu ya kimpeve. Ya lombaka ntete ti bawu zabana mutindu baprofete, na manima bawu—bawu sonikaka Ndinga ya lutwadusu ya kimpeve, mpe bawu kuzwaka ntendulu ya luzayikisu ya Kinzambi samu ti ya vwandaka Nzambi na kati ya muntu yango.

<sup>88</sup> Ntangu yayi yina ke mutindu Yandi kukitalisaka Yandi mosi na bidimbu ya kutalisama ya Yandi, ba vision ya bawu vwandaka siamisama, ya vwandaka kidimbu ya Nzambi na kati ya bawu, ke na kukizabisa Yandi mosi na bantu.

<sup>89</sup> Ntangu yayi, yina kele kaka mutindu Yandi vwandaka na Klisto. Profete vwandaka kaka mwa kitini. Klisto vwandaka Nzambi ya muvimba. Mpe Nzambi vwandaka na kati ya Klisto, samu na kuvutula ngwisani ya yinza na Yandi mosi. Mpe bidimbu ya Yandi zabikisaka Yandi, yina Yandi vwandaka, samu na yawu ti Yandi tubaka, “Kana Mu ke sala ve bisalu ya Tata ya Munu, na yina beno kwikila yawu ve. Kana Mu kele na nkadulu ya Tata ya Munu ve, na yina beno kwikila Munu ve, beno kwikila ve yina Munu ke na kutuba. Kana Mu kele na nkadulu ya Tata ya Munu ve, na yawu beno kwikila yawu ve, ata fyoti ve.”

<sup>90</sup> Ntangu yayi, bidimbu ya Yandi me sobaka ata fioti ve. Nzambi lendaka soba nkadulu ya Yandi ve, mutindu—mutindu mosi mwana-dimeme lendaka soba nkadulu ya yawu ve, to kima nyonso yankaka lendaka soba bidimbu ya yawu ve. Samu, kana ya kele ya yawu ya ke ya kisina, ya ke ya kisina. Mpe kana beno soba kima mosi, na yawu beno me soba yawu na kisina ya yawu.

<sup>91</sup> Ya kele kaka mutindu beno lenda baka ngulu mosi, mpe beno lenda kusukula ngulu mpe—mpe beno pakula yandi yendis na manzaka ya yandi, mutindu bakento ke salaka, mpe kupakula yandi rouge à lèvres, mpe kulwatisa yandi robe ya kitoko. Beno basisa ngulu yango, yandi ke kwenda mbala mosi na poto-poto, mpe ke baluka dyaka na poto-poto. Samu na yinki? Yandi kele ngulu, yimeni. Kasi, mpe, kasi, beno zaba, beno ke lenda sala ve . . .

<sup>92</sup> Mwana-dimeme lenda sala yawu ve. Yandi lenda kota ve na kati ya poto-poto yina. Yandi ke na kima ya kusala na yawu ve. Ya ke bidimbu ya yandi. Beno me mona? Beno lenda kulwatisa yandi bilele ya mutindu mosi, kasi ya kieleka yandi ke sala yawu ve, ya kieleka yandi ke kwenda kuna ve. Nganda ke na dyambu ve; ya kele kati. Ntangu yayi, Nzambi kele yinto ya luzingu nyonso . . .

<sup>93</sup> Beno kondwa yayi ve. Mu ke na kumeka, na nyonso yina kele na munu, na kunata beno na kumona kima mosi. Beno me mona? Ya kele samu na mambote ya beno, bankundi. Ya ke samu na nda—ndandu ya beno. Beno me mona?

<sup>94</sup> Mu me kwisa awa ve samu na kumonana. Mu me kwisa awa ve, samu ti ya vwandaka ve na kisika yankaka ya kukwenda. Mu me kwisa awa samu ti mu me zola kukwisa awa. Mu me zola ti ministere yina Mfumu pesaka munu fwana kumonana na kati ya bantu yayi awa, mpe mu ke na kusala nyonso na kunata beno na kumona kieleka yina Nzambi kele ntangu yayi. Yandi kele Ndinga ya Yandi ya nsilulu. Yandi ke vwandaka ntangu nyonso Ndinga, mpe Yandi ke kuzabanaka Yandi mosi na nzila ya kidimbu yina Yandi silaka. Nkadulu mosi ke monana na ntangu mosi, yina ke na kati ya Ndinga, na manima kidimbu ya muntu yayi yina fwana telama ke talisa muntu yango.

<sup>95</sup> Kikuma yawu yina Yesu fwanaka vwanda Yina Yandi vwandaka. Bawu zolaka mona yawu. Kuyituka ve ti bawu vwandaka bampofo. Dyambu yango. . . Ba tubaka, ata bimangu nyonso yina Yandi salaka, kasi ba lendaka kwikila ve, mpamba ve ti Esaie tubaka, “Bawu kele na meso kasi bawu lenda mona ve, mpe na makutu kasi bawu lenda kuwa ve.” Beno me mona? Konso nsungi, kaka nsungi ya Yandi ve; kasi konso nsungi, mutindu, “Nzambi, na bambala mingi, na bafwaso mingi,” kasi ba lendaka bakula yawu ve.

<sup>96</sup> Ntangu yayi, bidimbu ya Yandi ke kubwa ata fioti ve. Ya ke ntangu nionso mutindu mosi. Ntangu yayi, beno bambuka moyo ti, kidimbu ya Yandi, kidimbu ya Nzambi, lenda kubwa ve. Kana ya salama, na yina Nzambi me kubwa. Mpe Biblia me tuba, na ba-Hebreux 13:8, ti, “Yesu Klisto ke mutindu mosi mazono, bubu yayi, mpe kukonda nsuka.” Samu na yawu, Yandi kele Nzambi yina lenda soba ve. Nkadulu yina Yandi vwandaka na yawu na mbandukulu, Yandi ke kaka na nkadulu mosi yina. Konso mutindu yina Yandi salaka, na konso ntangu yina Yandi salaka kima mosi, Yandi ke sala yawu mutindu mosi kaka konso ntangu. Kana Yandi sala yawu ve, ya ke nkadulu ya Yandi me soba, beno me mona, mpe bidimbu ya Yandi ke talisa kima yina vwandaka ya Nzambi ve. Beno me mona? Na yawu beto ke zaba ve kisika. . .

<sup>97</sup> Mutindu Paul kutubaka, “Kana mpungi kupesa muningu ya mbote ve, nani ke zaba kukubama samu na kunwana mvita, kana mpungi kupesa muningu ya mbote ve?” Ntangu yayi kana mpungi fwana pesa muningu ya “kuvutuka na manima,” ya kele yina beto fwana sala, kuvutuka na manima. Kana mpungi kupesa muningu ya “kukubama,” ya kele yina beto fwana kusala, ya kele kukubama. Kasi yinki kele Mpungi? Ya kele Ndinga ya Nzambi. Ya ke talisa Nzambi, kana ya kele—kana ya kele “beno kwenda na ntwala, beno vwanda, beno vutuka na manima, beno kanga minduki,” nionso yina ya kele. Ya kele muningu ya Mpungi ya Nzambi.

<sup>98</sup> Mpe muningu ya mbote ve, ntangu Biblia ke tuba ti kima mosi fwana kusalama; muntu mosi ke tuba, “Oh, ya vwandaka ya kilumbu yankaka, yina.” Na yawu ya ke na muningu ya mbote ve kuna. Na yawu beno ke zaba yinki kusala.

<sup>99</sup> Yesu tubaka, “Mu kele na kiyeka ya kupesa luzingu ya Munu mpe kubaka yawu dyaka.” Ya ke na muningu ya mbote ve.

<sup>100</sup> Kento yina tubaka, “Beto zaba ti Mesiya ke kwisa; mpe ntangu Yandi ke kwisa, Yandi ke tuba na beto mambu mutindu Yandi salaka.”

<sup>101</sup> Yandi tubaka, “Mu kele Yandi.” Ya vwandaka na muningu ya yimbi ve kuna. “Mu kele Yandi.” Uh-huh! Amen.

Bawu tubaka, “Batata ya beto kudyaka manna na ntoto ya kuyuma.”



102 Yandi tubaka, “Ba ke, bawu nyonso, me kufwaka.” Yandi tubaka, “Kasi Mu kele Dimpa ya Luzingu yina me katuka na Nzambi kuna na Zulu.” Ya ke muningu ya yimbi ve. “Mu kele Yinti ya Luzingu, yina vwandaka na disamba ya Eden.” Ve, ya ke na muningu ya yimbi ve samu na yawu. Ya kieleka ve. Ya kele ata na kima ya luvunu ve samu na yawu. Yandi kwikilaka kieleka na nyonso yina Yandi salaka.

103 Biblia ke pesa ve muningu ya yimbi. Ya ke talisa kidimbu ya Nzambi na muningu ya yawu.

104 Yesu tubaka, na Santu Jean 10:37, “Kana Mu ke sala bisalu ya Tata ya Munu ve, yina. . . mpe ti Mu kele na nkadulu ya Tata ya Munu ve, na yina beno kwikila Munu ve. Ya kele na yawu, ba ke zaba nkadulu ya Yandi na kati ya Munu, na bidimbu ya Yandi.”

105 Samu ti, Tata kele Ndinga, “Na mbandukulu vwandaka Ndinga, mpe Ndinga vwandaka na Nzambi, mpe Ndinga vwandaka Nzambi,” mpe kidimbu ya Yandi me talisama na nzila ya nsilulu ya Yandi samu na nsungi yina.

106 Ntangu yayi kana Yandi zingaka na ntangu ya Moise, ya zolaka salama ve. Mpe kana Moise zolaka zinga na ntangu ya Yandi, ya zolaka salama ve. Kana Yandi zingaka na ntangu ya Noe, ya zolaka salama ve, to kana Noé zingaka na ntangu ya Yandi. Noé vwandaka kupesa profesi ya mambu ya kilumbu yina, mpe kidimbu ya yandi mpe yina yandi salaka zabikisaka yandi na Ndinga ya Nzambi. Moise salaka kima ya mutindu mosi.

107 Mpe awa Yesu kwisaka, mpe Ndinga yina ba silaka samu na nsungi yina talisamaka na Yesu Klisto na nzila ya kidimbu ya Ndinga, yina kele Nzambi. Amen.

108 Kutwamuka ya Mpeve-Santu, na bilumbu ya nsuka, na bantu ya mpamba, me talisa kidimbu ya Nzambi na bantu. Yandi silaka yawu. Ya kele Ndinga. Yandi tubaka ti Yandi ke sala yawu. Muntu mosi ve lenda katula yawu. Yandi tubaka ti Yandi ke sala yawu.

109 Na yawu bima nyonso yina Yandi silaka, yawu yina Yandi salaka. Ya ke talisa kidimbu ya Yandi. Yinga, tata. “Beni kwikila yawu ve, beno kwikila ve yina Munu ke na kutuba, kana kidimbu ya Munu kele ve yina ya Nzambi.”

110 Ntangu yayi beno tala na Jean 14:12, “Yandi yina ke kwikila na Munu,” Yandi tubaka, “kele na kotalisama ya Munu, kidimbu ya Munu. Yandi yina ke kwikila na Munu, yandi mpe ke sala bisalu yina Mu ke sala.” Yina ke talisa ti nkadulu ya Klisto kele na yandi, ya ke talisa bidimbu ya Yandi. Amen.

111 Mu ke kukimonaka musambidi ntangu yayi, ata ti ndinga ya munu kele ya kukawuka. Yinga, tata. Oh, la la! Beni me mona, ya kele na kifu ve samu na Yawu! Luzingu ya Yandi! “Yandi yina ke kwikila na Munu, yandi mpe ke sala bisalu yina Mu ke

salaka yandi mpe ke sala yawu.” Beno me mona, yina ke talisa kidimbu yango.

<sup>112</sup> Yandi tubaka diambu ya mutindu mosi: “Kana nkadulu ya Munu ke talisa Munu mosi ve,” Nzambi na kati—na kati ya Yandi, na yawu Yandi. . . beno kwikila Yandi ve. Ntangu yayi, Yandi tubaka diaka ti Yandi ke talisama na yawu. Na yawu, ti, kana ya talisa Yandi ve, na yawu Yandi kele ve yina Yandi ke tuba.

<sup>113</sup> Mpe, bubu yayi, kana Klisto ke kukitalisa ve Yandi mosi, kidimbu ya Klisto yina ke talisa beto mutindu ya Klisto, na kukwikilaka Ndinga. . . Yesu vwandaka Ndinga, na yawu Yandi lungaka kukwikila Ndinga. Mpe yinki mutindu beto lenda tuba ti beto kele ya Klisto, mpe kumanga konso Ndinga ya Biblia yayi? Mpeve-Santu ya Klisto kele Nzambi na kati ya beno, mpe Yawu ke ndima konso nsilulu na “Amen.” Biblia me tuba, “Bidimbu yayi ke landa bawu yina ke kwikila.” Mpeve ya Nzambi ke tuba, “Amen.” Beno me mona?

<sup>114</sup> Mosi ya bawu ke tuba ve, “Ve, yina vwandaka samu na nsungi yankaka; ya vwandaka kaka samu na bilandi.”

<sup>115</sup> “Beno kwenda na yinza ya muvimba mpe beno longa Nsangu ya mbote na bantu nyonso. Yandi yina, kisika nyonso na yinza, ke kwikila, bidimbu yayi ke landa yandi, kima ya mutindu mosi.” “Mutindu mosi mazono, bubu yayi, mpe kukonda nsuka,” kidimbu me talisama.

<sup>116</sup> Ya kele yina ke sala Hebreux 1:1, “Nzambi na bambala mingi, vwandaka zonza na batata na nzila ya bapofete,” ya ke talisa Klisto, yina me vumbuka na lufwa bubu yayi, na nzila ya kidimbu mosi yina Yandi salaka na bambala mingi. Beno me bakula? Nzambi me sobaka nzila ya Yandi ata fioti ve.

<sup>117</sup> Na Biblia ya ntama, ntangu muntu yina vwandaka lota ndosi, mpe ya vwandaka ve na profete na yinsi samu na kumona kana ndosi yayi vwandaka kieleka to ve, ba vwandaka na mutindu yankaka ya kuzaba. Ba vwandaka nata nkadulu yango, ata nani yina lotaka ndosi, ba vwandaka nata yandi na tempelo. Poshe ya ntulu ya Aaron, yina vwandaka nganga-Nzambi ya mbuta, ba tulaka yandi na dikunzi. Mpe muntu yayi ke lotaka bandosi tubaka ndosi yayi. Ata ti ya ke na muningu ya mbote, ata ti ya vwandaka na muningu ya kieleka; kana ya vwandaka na Mwinda ya mazulu ve yina vwandaka nganga na zulu ya matadi yango, yina ba bokilaka Urim Thummim (bayina ke tangaka Biblia me bakula); na yawu, ata ti ya bulaka muningu ya kieleka, ya vwandaka yawu ve. Kukondwa mumesanu ya Nzambi, nkadulu ya Nzambi, fwana kutalisa bidimbu ya Yandi na mutindu ya mazulu, samu na kutalisa ti Yandi me kukitalisa Yandi mosi na nsangu. Amen.

<sup>118</sup> Mu ke tuba kima mosi na nkokila yayi. Urim Thummim ya ntama me zimbana, kasi Ndinga kele dyaka kima yina ke talisa bidimbu ya Nzambi, nsilulu ya ngunga yina beto ke na kuzinga.

Ya kele na bidimbu ya Nzambi yina me talisama na nzila ya nsilulu ya ngunga yina beto ke na kuzinga.

<sup>119</sup> Ya ke sala Nzambi mutindu mosi Yandi vwandaka. “Na bambala mingi,” beno tala, “na bafwaso mingi, Yandi vwandaka zonza na batata na nzila ya baprofete.” “Mpe musiku mpe baprofete vwandaka tii na Jean; katuka kuna, Kimfumu ya Zulu.” Beno tala, “Kasi na kilumbu ya nsuka yayi,” ya ke na kuzonza kima mutindu mosi na yina Yandi salaka kuna, “na nzila ya Mwana ya Yandi Klisto Yesu.” “Nzambi, na bambala mingi, na bafwaso mingi, vwandaka zonza na batata na nzila ya baprofete; na kilumbu ya nsuka yayi,” ke na kusalaka kima mutindu mosi, “ke na kuzonza na bantu (batata) na nzila ya Mwana ya Yandi Klisto Yesu.” Yandi vumbulaka Yandi na lufwa, mpe Yandi ke na kuzingaka na kati ya beto, ya ke na kukitalisa Yandi mosi mpe ke na kuzabisa beto mambu na ntuala, ti Yandi kele yina ke swasikisaka mabanza mpe bansatu ya ntima. Yesu Klisto mutindu mosi mazono, bubu yayi, mpe kukonda nsuka! “Nzambi, na bambala mingi mpe na bafwaso mingi vwandaka zonza na batata na nzila ya baprofete, kasi na bilumbu yayi ya nsuka na nzila ya Yesu Klisto Mwana ya Yandi.” Ba lenda sobisa ve Masonuku. Ya kele ya kulunga.

<sup>120</sup> Mutindu mu vwandaka tuba ntete, Nzambi ke na nsatu ya muntu ve samu na kutendula Ndinga yayi. Yandi ke tendula Ndinga ya Yandi Mosi. Ntangu Yandi ke tuba kima mosi, yawu ke salama, yawyu yina ntendulu. Beno me mona? Yandi zola ve muntu kutuba, “Mbote, mu ke kwikila ti ya zola tuba mutindu *yayi*.” Nzambi ke talisaka yawu na nzila ya ntendulu ya Yandi Mosi.

<sup>121</sup> Ya kele, kana nsilulu kele ya kilumbu yango, beto lenda ve kuzinga na nsemo ya—ya—ya Luther, beto lenda ve kuzinga na nsemo ya Wesley, beto lenda ve kuzinga na nsemo ya bawu. Beto fwana kuzinga na Nsemo yina ba silaka samu na kilumbu yayi.

<sup>122</sup> Yinki kana Moise kwendaka na Egypte, mpe tubaka, “Mbote, beto ke tunga masuwa ya nene. Beto ke basika na yinsi yayi na kulutaka na zulu ya masa. Nzadi yayi Nile ke mata?” Ba zolaka tala na buku; ya ke ata na nsilulu mosi ve samu na yina. Ya kieleka. Kasi, beno me mona, yandi vwandaka talisama yandi mosi mutindu profete ya Nzambi, samu na yina yandi vwandaka tuba ke salama, na yawu ba zabaka ti yandi vwandaka na Ndinga ya Mfumu. Pharaon vwandaka na matolotolo, kasi Moise vwandaka na Ndinga. Na yawu ntangu ba kumaka na nzadi, matolotolo nyonso kwendaka na nsi ya nzadi; mpe Moise zabusaka Israel na nzadi, na ntoto ya kuyuma, samu ti yandi vwandaka na Ndinga, mpe ti yandi vwandaka Ndinga ya ngunga yina. Moise vwandaka Ndinga yina me monisama na ngunga yina.

Elie vwandaka Ndinga yina me monisama na ngunga yina.

123 Klisto kele ya Ndinga yina me monisama, mpe bansilulu yina Yandi salaka. “Na ntangu fyoti mpe yinza ke mona Munu dyaka ve; kasi beno ke mona Munu, samu ti Mu ke vwanda na beno, mpe na kati ya beno, tii na nsuka ya yinza. Bisalu yina Mu ke na kusala beno mpe ke sala yawu.” Yandi silaka bima yayi. Yinki ya kele? Ya ke kidimbu ya Nzambi yina ke na kutalisa Ndinga ya Yandi, mutindu Yandi salaka na bansungi nyonso.

124 Na Malachie 4, Yandi tubaka, “Na ntwala ya kilumbu ya nene mpe ya mpasi ya Mfumu kukwisa, beno tala, Mu ke tinda beno profete Elie; mpe yandi ke vutula lukwikilu ya bana na batata dyaka, ntete kilumbu yango kukwisa.” Yandi silaka yawu.

125 Yesu tubaka, na kapu 17 ya Santu Luc, “Mutindu ya vwandaka na bilumbu ya Sodome, mutindu mosi ya ke vwanda na kwizulu ya Mwana ya muntu, ntangu Mwana ya muntu ke monisama.” Ntangu luzayikisu ke zibuka yawu mosi, na bilumbu yango ntangu yinza ke vwanda mutindu Sodome, yinki ya ke vwanda? Kidimbu ya Masonuku yango ke lungisama. Nzambi ke na kukitalisa Yandi mosi na nzila ya kidimbu ya Yandi, bidimbu yina Yandi ke vwandaka na yawu ntangu nionso. Yandi lenda ve kubika yawu.

126 Na bilumbu ya nsuka, Yandi me talisama na nzila ya Mwana ya Yandi. Beno tala yinki mutindu Nzambi ke salaka yayi konso ntangu na . . . mutindu Yandi kon-. . . Yandi ke sobaka ata mbala mosi ve mutindu ya Yandi.

127 Bantu tatu yina vwandaka solula na Abraham, mutindu beto vwandaka zonzilaka yawu kuna, na bilumbu ya Sodome.

128 Abraham vwandaka muntu yina vwandaka kwikila na Nzambi. Yandi bakaka Nzambi na nsilulu ya Yandi. Sarah, kento ya yandi, vwandaka na bamvula makumi sambanu na tanu, Abraham vwanda na bamvula makumi sambwadi na tanu, ntangu Nzambi bokilaka yandi. Yandi tubaka ti bawu ke kuzwa mwana; Abraham ke kuzwa mwana na nzila ya Sarah. Ya lendaka wakana mutindu mwa buzoba, kasi mu banza yandi bakaka mwa baboti ya bana na ba-epingle nyonso, mpe bima nyonso, ya kukubama, samu ti bawu ke kuzwa bébé yayi.

129 Na manima ya bilumbu makumi zole na nana ntete, na yina, Abraham lendaka kutuba na Sarah, “Yinki mutindu nge ke na kuwa, chérie?”

“Ata luswaswanu kele ve.”

“Nkembo na Nzambi, beto ke kuzwa yawu, na mutindu nyonso.”

“Yinki mutindu nge me zaba?”

“Nzambi tubaka yawu.”

Mvula mosi lutaka. “Yinki mutindu nge ke na kuwa, chérie?”

“Ata luswaswanu kele ve.”

“Beto ke kuzwa yawu, na mutindu nyonso. Nzambi tubaka yawu.”

Bamvula tanu lutaka. “Yinki mutindu nge ke na kuwa ntangu yayi, chérie?”

“Ata luswaswanu kele ve.”

“Beto ke kuzwa yawu, na mutindu nyonso. Nzambi tubaka yawu.”

<sup>130</sup> Yinki ya vwandaka? Yandi vwandaka na nsilulu ya Nzambi. Yandi kwikilaka Nzambi, mpe yandi salaka mutindu Nzambi: yandi kangamaka na Ndinga yina ba silaka. Yawu. . .

<sup>131</sup> Bamvula makumi zole na tanu lutaka. Baboti ya bana vwandaka me kuma jaune, kasi yandi vwandaka bumba yawu kaka. Ntangu yayi yandi me kuma kiboba, mpe me kondama, mpe yandi vwandaka na ntela ya mbote ve; mpe kivumu ya Sarah vwandaka ya kufwa mpenza, mpe bakala vwandaka kisita. Mpe tala mutindu ba kumaka!

<sup>132</sup> “Yinki mutindu nge ke na kuwa, Abraham, tata ya bayinsi?” bankundi ya yandi ya bakwikidi ya kati-kati tubaka na yandi mutindu yina.

<sup>133</sup> “Mbote, nkembo na Nzambi, mu ke na kuwa mbote. Beto ke kuzwa bébé yango, na mutindu nyonso.” Samu ti yandi kulembaka ve na nsilulu ya Nzambi na nzila ya kukondwa lukwikilu; kasi yandi vwandaka na ngolo, ya vwandaka pesa nkembo na Nzambi, samu ti yandi ndimaka mpenza ti yawu yina Nzambi tubaka, Nzambi ke na kiyeka ya kusala yawu. Amen. Beno tala kidimbu ya mukwikidi.

<sup>134</sup> Yinki diambu samu na beno? Beno me mona? Yinki diambu samu na beto, bana ya Abraham? Beto me talisama na Ndinga ya Nzambi, mutindu nsilulu, mpe kidimbu ya beto ke talisa beto mosi, ti kieleka beto me kwikila Yawu? To, beto ke yenga-yenga kaka, kudumuka *awa*, mpe na *awa*, mpe na nsi *awa*, mpe kubanza, mpe kuyenga-yenga bisika nyonso, samu na Yawu? Na yina, beto kele Baklisto ve, beto ke na kumeka kaka na kukwikila.

<sup>135</sup> Kasi, ntangu beto ke telama kieleka na nsilulu yango, kukatuka kuna ve kasi kukangama na Yawu! Abraham salaka yawu.

<sup>136</sup> Ntangu yayi beto ke mona ti, kilumbu mosi yandi monaka bantu tatu ke na kukwisa, ba ke na tambula. Biblia me tuba awa ti, “Ya vwandaka na kati-kati ya kilumbu na mwini,” ya zolaka vwanda na midi. Bantu yayi kwisaka mpe vwandaka solula na yandi. Beto zaba ti zole ya bawu kulumukaka na Sodome. Mu zaba ti beto zonzilaka yawu na nkokila yina. Mosi ya bawu bikanaka na yandi.

<sup>137</sup> Beno tala mbote Muntu yayi yina yandi bokilaka . . . yina bikanaka na yandi, yinki Muntu yango salaka. Mosi talisamaka na nzila ya kidimbu ya Yandi, ti Yandi vwandaka Elohim.

<sup>138</sup> Elohim, kieleka ndinga ya ntete na Biblia, “Na mbandukulu Nzambi . . .” Ntangu yayi, beno nionso bantu ya mayele zaba ti mpova yayi *Nzambi* ya zola kutuba, na ki-Hebreux, ya ke “Elohim,” yina zola kutuba, “ya Ngolo nyonso, yina me kulunga na nyonso, yina ke zingaka na yandi mosi,” yina ke na nsatu ya lusalusu ya muntu ve, yina ke na nsatu ya ntendulu ya muntu ve; Yandi Mosi ke salaka yawu. Yandi kele Nzambi yina ke ya kulunga na nyonso, yina kele bisika nyonso, yina zaba nyonso, ya ngolo nyonso. Yandi kele Nzambi.

<sup>139</sup> Kuna Yandi vwandaka. Mpe Abraham ntangu yayi, tata yayi ya makanda nionso zabaka mbote Ndinga, ya vwandaka tala Muntu yayi. Mpe na yina Muntu yayi pesaka mukongo ya Yandi na tenta, Yandi tubaka, “Wapi kento ya nge, Sarah?”

Yandi tubaka, “Yandi kele na kati ya tenta, na manima ya Nge.”

<sup>140</sup> Yandi tubaka, “Mu ke kwisa tala nge na kulandila ntangu ya luzingu, mpe nge ke kuzwa bébé yina Mu silaka nge.”

<sup>141</sup> Mpe Sarah sekaka samu na yawu. Mpe Yandi yina vwandaka solula na yandi, tubaka na yandi yina Sarah tubaka na kati ya tenta, na manima ya Yandi.

<sup>142</sup> Ntangu yayi, na Genèse, beto ke tanga yawu. Beto me mona ti na manima, Abraham, na manima Muntu yayi kukitalisaka Yandi mosi . . .

<sup>143</sup> Yinki ya vwandaka? Na ba-Hebreux, na kapu 4, na nzila ya 12, ya me tuba, “Ndinga ya Nzambi kele na meno mingi, na meno mingi kulutila mbele yina kele na meno balweka zole, yina zaba mabanza mpe bansatu ya ntima.”

<sup>144</sup> Yandi zabaka ti yayi vwandaka Muntu yango. Yandi zabaka ti ya vwandaka na profete ve na yinsi kasi kaka yandi, mpe samu na yawu Ndinga ya Mfumu kwisaka na yandi. Mpe yandi vwandaka profete, mpe awa Ndinga kwisaka na profete.

<sup>145</sup> Diambu ya mutindu mosi na Jean Baptiste. Ya vwandaka na profete ve bamvula nkama yiya. Mu me bambuka moyo . . .

<sup>146</sup> Ntangu yankaka kiboba yayi ya Docteur Davis kele ya kuvwanda awa, na nkokila yayi, longi ya Baptiste ya ntama ya Missionaire yina botikaka munu na Lukwikilu. Yandi vwandaka solula na munu. Yandi tubaka, “Billy, nge ke ntete mwana ntangu yayi. Nge fwana kuwa munu.”

Mu tubaka, “Mbote, Mpangi Davis, mu ke na kuwa.”

<sup>147</sup> Yandi tubaka, “Nge me mona, Jean bakaka mbotika ve. Na yawu yandi vwandaka botika, kasi yandi bakaka mbotika ve; muntu ve vwandaka ya kulunga samu na kubotika yandi.” Yina

ke théologie ya mbote ya ba-Baptiste. “Mpe awa kwisaka Yesu, mpe tubaka kuna . . . Jean tubaka, ‘Ya kele munu yina kele na nsatu ya kubaka mbotika na Nge; samu na yinki Nge me kwisa na munu?’ Mpe Yandi tubaka, ‘Bika ya vwanda mutindu yina.’” Yandi tubaka, “Na yawu ntangu yandi ‘bikaka’ Yandi,” yandi tubaka, “nge me mona, na yawu Yesu botikaka Jean. Mpe na ntangu Yandi basikaka na masa, na yawu mazulu zibukaka mpe Yandi monaka Nzambi na mutindu ya yembe, ke kulumuka mpe kwisaka na zulu ya Yandi, kutuba, ‘Yayi kele Mwana ya Munu ya luzolo, Yina Mu me sepela na kuzinga na kati ya yandi.’” Kasi, ve, ya kele ve samu na kuwisana ve na Docteur Davis, kasi yandi vwandaka na kifu.

<sup>148</sup> Beno me mona, Jean vwandaka profete, mpe Ndinga ke kwisaka ntangu nionso na profete. Na yawu kana Ndinga kumaka muntu, Ya fwana kwisa na profete, na mutindu nyonso; samu ti, yandi vwandaka pesa kimbangi ya Ndinga, mpe kidimbu ya yandi ya kieleka vwandaka kutalisa yandi mutindu yina. Awa me kwisa Ndinga, ntangu yayi yinki salamaka? Kaka na ntangu yina yandi kutanaka na Yesu, Jean tubaka, “Mu ke na nsatu ya kubaka mbotika na Nge; samu na yinki Nge me kwisa na munu?”

<sup>149</sup> Yesu tubaka, “Bika yawu vwanda mutindu yina, samu ti ya kele mbote ti beto (ya me lunga samu na beto) na kulungisa nyonso yina kele ya kusungama.” Jean vwandaka profete; Yandi vwandaka Ndinga. Yandi vwandaka Munkayulu, mpe Yandi zolaka kota na kisalu ya Yandi ya ntoto, mpe ya lombaka ti ba sukula Munkayulu na ntwala ya kupesa yawu. Mpe Jean botikaka Yandi, samu ti yandi zabaka. “Bika yawu vwanda mutindu yina, samu ti ya kele mbote ti beto lungisa nyonso yina kele ya kusungama.” Ya lombaka ti ba sukula Munkayulu na ntwala ba pesa yawu, mpe na yawu Jean botikaka Yandi. Ya vwandaka Yesu ve yina botikaka Jean. Jean botikaka Yesu. “Bika yawu vwanda mutindu yina.”

<sup>150</sup> Beno tala, awa vwandaka Abraham, mpe yandi vwandaka na Ndinga ya Mfumu. Ndinga ya Mfumu kwisaka na yandi. Yandi vwandaka profete. Mpe ntangu yayi awa kwisaka Ndinga. Yandi bokilaka yandi, “Abraham,” *Abram* ve.

<sup>151</sup> Bilumbu fyoti na ntwala ya yina, nkumbu ya yandi vwandaka Abram—vwandaka Abram, ntangu yayi ya me kuma Abraham. Kento ya yandi vwandaka Sari, ntangu yayi ya me kuma “Sarah,” S-a-r-r-a ve; S-a-r-a-h. (A-b-r-a-h-a-m) ve A-b-r-a-m, kasi A-b-r-a-h-a-m, Abraham.

<sup>152</sup> Mpe Muntu yayi kukitalisaka Yandi mosi, ntangu Yandi tubaka, “Abraham!” Oh, la la!

Abraham tubaka, “Elohim!”

<sup>153</sup> Beno tala Ndinga na profete, kintwadi, bawu zole kutalisamaka.

- 154 Elohim, Yandi tubaka, “Wapi kento ya nge, Sarah?”
- 155 Yandi tubaka, “Yandi kele na kati ya tenta, na manima ya Nge.” Mpe. . . Na manima kimangu kusalamaka. Elohim! Abraham bokilaka Yandi, “yina kele ya kulunga na nyonso, ya Ngolo nyonso, Nzambi ya ngolo nyonso.”
- 156 Yesu tubaka, ntangu Yandi vwandaka na zulu ya ntoto, ti Yandi salaka kima ya mutindu mosi yina Elohim salaka. Yina talisaka kidimbu ya Yandi mutindu Nzambi.
- 157 Mpe Yandi tubaka, na ntwala ti, “Na bilumbu ya nsuka, na kwizulu ya Mwana ya muntu, ntangu Yandi ke monana, diambu yango ke salama dyaka, mutindu ya vwandaka na Sodome.” Elohim na kati ya bantu ya Yandi, Nzambi ya Ngolo nyonso! Masonuku me tuba mutindu yina. Elohim na kati ya bantu!
- 158 Bamvula makumi yiya Yandi ke na kubotikaka beto na Mpeve-Santu, Elohim, Nzambi! Mpe dibuundu. . .
- 159 Beno tala, Abraham monaka kidimbu mosi, lubokilu yankaka; kidimbu mosi, lubokilu; lubokilu, kidimbu mosi; na kuingilaka mwana yina ya nsilulu. Kasi kidimbu ya nsuka yina yandi monaka, kumonana ya nsuka, kukwisa ya nsuka ya Nzambi na ntwala ya mwana ya nsilulu kukwisa, ya vwandaka Elohim na kati ya nzutu ya muntu. Na manima mwana ya nsilulu kwisaka.
- 160 Mpe Nkuna ya Abraham ke na kuingilaka Mwana ya nsilulu, Yesu Klisto. Mpe bawu me mona bidimbu, kumwangisama ya Mpeve-Santu, kutuba na bandinga ya malumu, kubeluka ya Kinzambi, mpe nyonso yina. Kasi ntangu Mwana ya muntu ke monisama, Elohim ke vutuka na Nkuna ya kimfumu ya Abraham mpe kutalisa kima mutindu mosi na yina Yandi talisaka na kilumbu yina, amen, Elohim, yawu yina ya vwandaka! Samu na yinki? Ya ke vwanda kidimbu ya Nzambi.
- 161 Ntangu yayi, kana Klisto vwandaka Nzambi, “Dyaka na ntangu fyoti mpe yinza ke mona Munu dyaka ve; kasi beno ke mona Munu, samu ti Mu ke vwanda na beno, mpe na kati ya beno, tii na kilumbu ya nsuka, na nsuka. Beno mpe ke sala bisalu yina Mu ke sala.”
- 162 Yesu tubaka yawu na—na Luc, kapu 17. Mbote mingi, ntangu beto me kwikila mpe ke mona bilumbu yayi ya nsuka, diambu yango fwana salama dyaka.
- 163 Na yina, Hebreux 1:1, “Nzambi, na bambala mingi kutalisamaka Yandi mosi na nzila ya bapofete, na bilumbu ya nsuka yayi ya me talisama na mvumbukulu ya Mwana ya Yandi na lufwa,” na kupesaka Dibundu kidimbu ya mutindu na yina Yandi vwandaka na yawu, samu na kukumisa Hebreux 13:8 ya kieleka mpenza.



164 Ba lenda katula yawu mapapu ve. Ya kele mapapu ya mpongo. Ya ke vwandaka ngolo, samu ti ba kele bandeke ya mazulu. [Kisika ya mpamba na bande—Mu.] . . . ba ke disaka bawu na madya ya bampongo.

165 Ntangu yayi beto ke mona ti, “Na bambala mingi, na mitindu mingi, Yandi vwandaka zonza na batata na nzila ya baprofete, na bilumbu ya nsuka na nzila ya Mwana ya Yandi Yesu Klisto, na kuvumbulaka Yandi na lufwa.” Mpe awa Yandi kele na kati ya beto, na manima ya bamvula mafunda zole, Yesu yina mosi, mosi ya baprofete ve; Yesu, alléluia, Mwana ya Nzambi yina me vumbuka na lufwa!

166 Yesu tubaka, kilumbu mosi, Yandi tubaka, “Nsungi ya nkú mpe ya kindumba ke sosa kidimbu, mpe bawu ke kuzwa kidimbu mosi.” Nsungi ya nkú mpe ya kindumba. Yinki ntangu yinza vwandaka ya kulutila yimbi, to ya kindumba mpe ya kubeba, kulutila yina ya kele ntangu yayi?

167 “Mutindu ya vwandaka na bilumbu ya Jonas, na yina Jonas vwandaka bilumbu tatu mpe bampimpa tatu na kati ya kivumu ya mbisi ya nene, mutindu mosi Mwana ya muntu fwana vwanda na kati ya ntima ya ntoto bilumbu tatu mpe bampimpa tatu.”

168 Na yina, “nsungi ya nkú mpe ya kindumba” zolaka kuzwa kidimbu mosi. Yinki mutindu ya kidimbu? Kidimbu ya mvumbukulu. Mpe beto kele na yawu bubu yayi, na manima ya bamvula mafunda zole, Yandi ke zinga kaka. Yandi kele na kati ya beto, na nkokila yayi, mutindu mosi mazono, bubu yayi, mpe kukonda nsuka, ke kukitalisa Yandi mosi na mitinu ya Nzambi, na kumonisaka Ndinga na kilumbu yayi yina Yandi silaka na kusala. Amen.

169 Beno tala Ndinga. Ntangu yayi beno ke kwikila kidimbu? ya kele kima yina ke landa, bilumbu ya nsuka, kutalisama ya Yandi na nzila ya Mwana ya Yandi. Beno tala.

170 Nzambi zonzaka na Moise na bambala mingi. Na Deuteronome 18:15, ya ke tuba, “Mfumu Nzambi ya beno ke telemisa Profete mosi mutindu Munu.” Ntangu yayi beno tala mbote. Yina kele Ndinga. Yina kele Ndinga. Yina vwandaka Nzambi. Ya vwandaka Mve oise. Yinki mutindu Moise zolaka zaba yawu? Yandi vwandaka muntu. Kasi Nzambi, na kuzonzaka na nzila ya Moise, tubaka mambu yayi. Beno me kwikila yawu? Mbote mingi.

171 Ntangu yayi beno tala Yesu, beno tala mbote mutindu bidimbu ya Yandi—ya Yandi kutalisaka Ndinga yayi ya nsilulu ya kieleka. Kieleka Yandi salaka yawu. Yandi talisamaka na nzila ya kidimbu yayi yina Moise tubaka ti Yandi ke vwanda.

172 Mingi kati ya bawu, mutindu bubu yayi, ba zola kumona muntwadisi mosi ya nene. “Oh, yayi kele Docteur ya Philosophie *Kingandi*. Yandi me basika na Lukolo ya nene ya Hartford.” To, “Yandi me basika na mwa kima ya nene mingi kisika mosi ya

mutindu yina.” Yina kele kutalisama ya Nzambi ve. Ve, ve. Ata kima ve samu na yawu. Ndinga kele yina ke talisa Nzambi. Beno me mona?

<sup>173</sup> Yesu vwandaka muntu ya mayele ya lukolo ve, to Yandi vwandaka nganga-Nzambi ve, to Yandi vwandaka rabbin ve, na kulandila yinza. Yandi vwandaka kimpumbulu, samu na yinza.

<sup>174</sup> Kasi Nzambi vwandaka siamisa Ndinga ya Yandi na nzila ya Yandi, yina salaka Yandi Emmanuel. Yina vwandaka kutaluisama ya Yandi. Ntangu yayi, awa, kieleka Yesu kulungisaka yina Nzambi kutubaka na Yandi na ntangu ya ntama ti Yandi ke sala, na nzila ya Moise, yina Yandi ke sala.

<sup>175</sup> Ntangu yayi beno tala mbote ntangu Yandi kukutanaka na Pierre, mutindu beto talisaka yawu na mpimpa yina, ntangu Yandi kutanaka na Pierre mpe tubaka na Pierre yina vwandaka nkumbu ya yandi. Kidimbu yayi vwandaka talisa banzonzolo ya Yandi ya Bumesiya, na Pierre, samu ti Ndinga tubaka, “Mfumu Nzambi ya beno ke telemisa Profete mosi.”

<sup>176</sup> Mpe Pierre kwisaka kuna, yina vwandaka Simon ntete, yandi kwisaka kisika Yandi vwandaka. Mpe Yesu talaka yandi, ya tubaka, “Nkumbu ya nge kele Simon, mpe nge kele mwana ya Jonas.” Yina talisaka nkadulu ya Klisto na kuvwanda Ndinga yina Moise silaka. Pierre kuzabaka ti kidimbu yina vwandaka talisa Yesu mutindu Mesiya. “Nzambi vwandaka na kati ya Klisto,” kupakulama samu na bilumbu ya nsuka. Na Nathanael . . . Beno bambuka moyo ti, Yandi tubaka na Simon nkumbu ya yandi.

<sup>177</sup> Ntangu yayi, beno tala mbote, na Nathanael Yandi tubaka yina yandi salaka. “Nge vwandaka na nsi ya yinti ntangu Mu monaka nge.” Yina vwandaka talisa Yandi mutindu Mesiya.

<sup>178</sup> Yandi tubaka, “Nge kele Mwana ya Nzambi. Nge kele Ntinu ya Israel.” Yandi talisamaka na nzila ya kidimbu ya Ndinga ya nsilulu yina Yandi zolaka vwanda Mesiya. “Mfumu Nzambi ya beno ke telemisa Profete mosi.”

<sup>179</sup> Mwa kento yina na dibulu ya masa, Yandi tubaka na yandi nani yandi vwandaka, mpe yina vwandaka talisa Yandi mutindu Mesiya yina ba silaka. Beno me mona?

<sup>180</sup> Nkadulu ya Yandi, bidimbu ya Yandi, vwandaka Ndinga yina me talisama. Yina vwandaka bidimbu ya Yandi yina vwandaka talisa ti Ndinga vwandaka Nzambi, na yawu Nzambi talisamaka na kati ya Klisto. Ntangu yayi beno tala yawu mbote. Beno simba yayi.

<sup>181</sup> Na Pierre, Yandi talisamaka na Pierre na kubokilaka nkumbu ya yandi. Yandi talisamaka na Nathanael na kutubaka na yandi yina yandi salaka. Yandi talisamaka na kento yina, na kutubaka yina yandi vwandaka. Yina yandi . . . nani *yandi* vwandaka; yinki *yandi* salaka; mpe yina *kento* vwandaka. Yandi

talismaka na kidimbu ya Yandi ya Bumesiya, yina zolaka vwanda kidimbu ya Mesiya.

<sup>182</sup> Beno tala mwa kento yango kutuba kima mutindu mosi. “Tata, mu me mona ti Nge ke profete. Beto me kuzwaka ve profete na bankama ya bamvula. Beto me kuzwa mabuundu mingi, mambu mingi mpe ba dénominattion ya mutindu na mutindu, kasi beto me kuzwa profete ve na bankama ya bamvula. Beto zaba ti ntangu Mesiya ke kwisa, yayi kele yina ke talisa Yandi.”

<sup>183</sup> Yandi tubaka, “Mu kele Yandi, yina ke na kutuba na nge.” Ya ke na kima ya luvunu ve samu na yawu, “Mu kele Yandi.” Yina lakisaka Yandi.

<sup>184</sup> Kento yina vwandaka basika menga, ya zabaka Yandi mutindu Ndinga. Yinki mutindu? Na yina Yandi salaka ntangu lukwikilu ya kento kusimbaka Yandi. Yandi balukaka mpe tubaka, “Nani me simba Munu?” Yandi zabaka ti kima mosi me salama. Yina talisaka Yesu mutindu Mesiya.

<sup>185</sup> Yandi kwikilaka yawu, mpe yandi tubaka, “Kana mu lenda simba lele ya Yandi, mu ke kuzwa mavimpi ya mbote.”

<sup>186</sup> Na yawu kaka na ntangu yandi simbaka, Yandi balukaka, tubaka, “Ntangu yayi nani me simba Munu?” Mpe bawu nyonso kumangaka yawu. Kasi kidimbu ya Yandi ya Bumesiya . . .

<sup>187</sup> Amen! Mu banza ti beno me mona yawu, dibuundu. Beno kuwa, mutindu beto ke manisa.

<sup>188</sup> Kuna kento simbaka Yandi. Ya vwandaka na bankama ya bantu, mu banza, yina vwandaka meka na kusimba Yandi. Pierre nganinaka Yandi, yandi tubaka, “Mbote, bawu nyonso ke na kusimba Nge.”

<sup>189</sup> Yandi tubaka, “Yinga, kasi muntu me simba Munu na mutindu luswaswanu.” Yina ke mutindu yina, ti lukwikilu ke simbaka. Beno me mona? Yandi tubaka, “Muntu me simba Munu. Ya vwandaka kusimba ya luswaswanu. Ya me lembisa munu. Ngolo me basika na Munu. Nkadulu ya mbote me basika na Munu.” Ntangu yayi, Yandi vwandaka kuna.

<sup>190</sup> Ntangu yayi, ata mpe bilandi ya Yandi Mosi tubaka, na bampova yankaka, “Nge ke na kuzonza—ke na kuzonza mutindu ti Nge ke na kimbevo ya yintu. Mpamba ve, bantu, muntu nyonso ke na kusimba Nge.”

<sup>191</sup> Beno Yandi, beno tala kutalisama ya Yandi ntangu yayi. Yandi balukaka, talaka nkonga ya bantu. Yandi zabaka yandi na mbala mosi. Yandi zolaka bumbana dyaka ve. Yandi tubaka na yandi diambu ya yandi, mpe tubaka, “Lukwikilu ya yandi me belusa yandi.”

<sup>192</sup> Kento zabaka, na nzila ya yayi, ti, Hebreux 4:12, “Ndinga ke swasikisaka mabanza, bansatu ya ntima.” Kidimbu ya Yandi

kutalisaka ti Yandi vwandaka “Ndinga ya Nzambi yina me kuma muntu mpe yina ke na kuzinga na kati ya beto.” Amen.

<sup>193</sup> Mu banza ti kima kaka mosi na nkokila yayi ke na kutalisa Yandi, Yesu Klisto yina vumbukaka na lufwa ke na kuzinga na kati ya beto na nkokila yayi, mutindu mosi mazono, bubu yayi, mpe kukonda nsuka. Ntangu yayi, mutindu Hebreux 13:8 kele kieleka, nkadulu ya Yandi ke talisa Yandi bubu yayi, mutindu ya salamaka kuna, mutindu mosi.

<sup>194</sup> Beno tala Cléopas mpe bayankaka, na manima ya mvumbukulu. Yesu talisamaka Yandi mosi na mutindu Yandi bukaka dimpa yina, ti Yandi salaka yawu mutindu kaka Yandi salaka yawu na ntuala ba koma Yandi na kulunsi. Mpe bawu. . . Yina talisaka kidimbu ya Yandi, samu ti yina kele mutindu Yandi salaka yawu.

<sup>195</sup> Ntangu yayi kana Yandi vwandaka awa na nkokila yayi, wapi mutindu Yandi zolaka kukitalisa Yandi mosi? Mutindu kaka Yandi salaka mazono, samu ti Yandi kele mutindu mosi bubu yayi, mpe ke vwanda kukonda nsuka. Ya ke kutalisama. Hebreux 4, kumi na yi- . . . 14 mpe 15, “Yandi kele ntangu yayi. . .” Ya me tuba, “Yandi kele Nganga-Nzambi ya beto ya Mbuta yina lenda simbama na nsatu ya bampasi ya beto.” Yandi kele Nganga-Nzambi ya beto ya Mbuta kaka na ntangu yayi. Na manima ya mvumbukulu ya Yandi, na manima ya lufwa ya Yandi, na manima ya kuzikama ya Yandi, na manima ya mvumbukulu ya Yandi, na manima ya nzakuka ya Yandi, amen, Yandi kele kaka mutindu mosi mazono, bubu yayi, mpe kukonda nsuka, Nganga-Nzambi ya Mbuta yina lenda simbama na bansatu ya bampasi ya beto. Amen. Yawu yina Yandi kele, kaka na ntangu yayi, samu na konso bakala to kento awa yina ke kwikila yawu. Yandi kele Nganga-Nzambi ya beto, mutindu mosi mazono, bubu yayi, mpe kukonda nsuka.

<sup>196</sup> Yandi ke zingaka ntangu nyonso. Beno ke kwikila yawu? [Dibuundu me tuba, “Amen.”—Mu.] Kidimbu ya Yandi ke talisa Yandi ntangu nyonso mutindu mosi Yandi vwandaka ntangu Yandi vwandaka zinga na zulu ya ntoto. Yandi kele dyaka na moyo awa, na nkokila yayi, na mutindu ya Mpeve-Santu. Yandi ke zinga ntangu nyonso. Mpe bidimbu ya Yandi ke vwanda na Yandi, kaka mutindu mosi ya vwandaka sala ntangu niosno, kana Yandi kele dyaka na moyo.

<sup>197</sup> Mu ke na kuvutula matondo, na nkokila yayi, ti, “Nzambi, na bambala mingi mpe na bafwaso mingi vwandaka zonza na batata na nzila ya baprofete, na bilumbu ya nsuka yayi na nzila ya Mwana ya Yandi Yesu Klisto.”

<sup>198</sup> Oh, mu vwandaka zaba ve ti mu me zonza mingi mutindu yayi. Mu zimbanaka yawu. Beno lemvokila munu. Mu ke. . . mu ke sukisa.

Beto sambila.

199 Tata ya Mazulu, Nzambi ya nene yina me fuluka na mawa! Mfumu, mu—mu. . .mu banza ti mu me zonza mingi. Mu ke sambila, Nzambi, kana mu me sala yawu, ti Nge lemvo kila munu. Kasi, Mfumu, mu lenda ve kulomba lemvo samu na yina mu me tuba. Mu me tuba kaka yina Nge tubaka na kati ya Ndinga ya Nge awa.

200 Ntangu yayi kaka mpova mosi to zole yina me katuka na Nge, Mfumu, mu banza muntu nyonso awa ke mona yawu na nkokila yayi. Mwa muntu yayi, muntu ya kubela ke beluka ntangu yandi ke mona ti Nge kele dyaka Nganga-Nzambi ya beto ya nene ya Mbuta. Mu ke sambila, Mfumu, na mwa baminuti ke landa, ti Nge ke sala ti Nsangu yayi kuzinga dyaka na bukieleka. Na yina mu me tuba na nzila ya Ndinga, bika ti kidimbu ya Nge katalisa Nge na kati ya beto, na nkokila yayi, ti Nge kele mutindu mosi mazono, bubu yayi, mpe kukonda nsuka, samu ti beto me lomba yawu na Nkumbu ya Yesu. Amen.

201 Kaka mwa ntangu fyoti ntangu yayi. Beto, mu—mu me lutisa mwa ntangu fioti, kasi beno nyonso ke zola kundima kuvwanda dyaka baminuti kumi na tanu, to baminuti makumi zole samu na ndonga ya bisambu? Kana beno me ndima, beno telemisa maboko ya beno, beno tuba, “Beto. . .” Mbote, matondo—matondo ya beno. Mu silaka kubika beno na ngunga ya makumi zole na mosi na baminuti makumi tatu. Ngunga yango me lunga ntangu yayi; ya ke ngunga makumi zole na mosi na baminuti makumi yiya. Na yawu kana beno lenda pesa munu diaka baminuti kumi, mu ke sala nswalu mpenza.

202 Beto tala, yinki bakalati ya bisambu ba me kabula bubu yayi? [Mpangi-bakala mosi me tuba, “O.”—Mu.] O? Yinki, wapi kisika beto bandaka na nkokila yina, mosi, mosi? [“Mu banza ti ya vwandaka mosi.”] Yinga, uh-huh.

203 Na yawu beto, mazono na nkokila, beto. . .Mpeve-Santu. . . Mu vwandaka kuwa bubu yayi, mpe mu vwandaka vutukila yina ba vwandaka tuba. Bayankaka bankumbu ya bawu vwandaka na Français, mu vwandaka. . .Mpeve-Santu; mutindu kaka samu na munu na kusala yawu, vwandaka kuingila mpe kumona.

204 Beno me mona, na bantangu yankaka ntangu beno ke monaka vision, ba fwana balula yawu mpe kutendula yawu. Ba me tendula yawu. Vision, mutindu beno lenda—beno lenda mona dimeme, yina zolaka kutuba mika. Beno me mona, beno fwana kuzwa mpe ntendulu ya yawu, beno me mona, mpe beno balula vision yango mpe beno tendula yawu.

205 Mpe mu monaka mazono na nkokila, mu—mu lendaka zonza ve bankumbu yina ya Français, ya lombaka ti mu tangulula yawu.

206 Na Afrique mpe kuna na ba-Hottentot mpe mimpani, mpe nyonso yina, Yandi vwandaka tangululula bankumbu ya bawu,

ya vwandaka tuba na bawu nani bawu vwandaka, vwandaka tangulula yawu na ndinga ya bawu. Bawu, bawu vwandaka zaba yinki ya vwandaka, kaka na ntangu ba vwandaka tangulula yawu. Kasi, beno me mona, kasi Yandi zaba bandinga nyonso. Yandi kele Nzambi ya Seko.

<sup>207</sup> Bika beto banda na nkokila yayi na, beto tuba, na makumi sambwadi na tanu, tii na nkama mosi, na O. Ya kele O, ya kele yina yandi tubaka? Mu. . . [Mpangi-bakala mosi me tuba, “Yinga. O.”—Mu.] O, O. Yinga. Mbote mingi. Nani kele na kalati ya bisambu makumi sambwadi na tanu, beno talisa yawu? Na O, kalati ya bisambu O, makumi sambwadi na tanu, telemisa diboko ya nge, muntu yina kele na yawu. Ya O. Mbote mingi. Beno yilama kaka *awa*. Makumi sambwadi na tanu, makumi nana, makumi nana na tanu, makumi yivwa, makumi yivwa na tanu, nkama mosi, beno kwisa mutindu *yayi* kana beno me zola. Mbote mingi, ya kele, beno vwanda na ndonga awa, na nswalu nionso, samu ti beto kele na ntangu mingi ve. Mu kele na kivuvu ti beno ke sala yawu.

<sup>208</sup> Beno tala kalati ya beno ya bisambu. Beno tala kalati ya bisambu ya mpangi ya beno yina kele pene-pene ya beno. Yinki. . . Mpe kana muntu kele kikata, beno sadisa bawu na kati ya ndonga ya bisambu. Na yawu kana bawu kele na O, mutindu kaka O, makumi sambwadi- . . .

<sup>209</sup> Makumi sambwadi na tanu tii na nkama mosi, beno vwanda na ndonga *awa*, kana beno me zola. Bisika nyonso beno kele, na balcon, bisika nyonso, beno kwisa na ntangu yayi, mpe beno kwisa na ndonga na nswalu mutindu beno lenda, kana beno me zola, samu na kunwanina ntangu.

<sup>210</sup> Ntangu yayi samu na bayankaka na kati ya beno awa, yina kele na kalati ya bisambu ve, beno lenda telemisa maboko ya beno mpe kutuba, “Mu kele na kalati ya bisambu ve, Mpangi Branham, kasi mu ke kwikila”? Beno telemisa maboko ya beno.

<sup>211</sup> Ntangu yayi beno bambuka moyo, ti mu ke tuba na beno samu na yina me tala Nganga-Nzambi ya Mbuta. “Yandi kele Nganga-Nzambi ya Mbuta yina lenda simbana na bansatu ya bampasi ya beto.” Yandi kele *Yehowa-Yile*, “Mfumu me pesa munkayulu.” Yandi kele *Yehowa-Rafa*, “Mfumu yina ke belusaka malai ya nge nyonso.” Beno me kwikila yawu? [Dibuundu me tuba, “Amen.”—Mu.] Yandi kele *Yehowa-Manassé*. *Kinwaninu ya kisengo yina ke kebaka nzutu, kinkuti ya kisengo, ngemba ya beto*, Yandi kele dyaka. Mbote, bantu yikwa ke kwikila ti bankumbu ya lusumbu nyonso yayi ya *Yehowa vwandaka samu na Yesu?* [“Amen.”] Kieleka, ya vwandaka samu na Yandi. Kana Yandi—kana Yandi. . . Mpamba ve, ba lenda kabula yawu ve, na yawu Yandi zolaka vwanda kaka nyonso ya yawu. Mpe kana Yandi kele dyaka *Yehowa-Yile*, Yandi kele *Yehowa-Rafa*. Kana Yandi kele *Yehowa-Yile*. . . Yandi kele *Yehowa-Yile*, yina kele

“Mfumu me pesa munkayulu samu na mpulusu,” na yawu Yandi kele *Yehovah-Rafa* yina “ke belusaka bimbevo ya beto nyonso.” Amen. Kubeluka lenda kwisa kaka na nzila ya Nzambi.

<sup>212</sup> Mbote mingi, na ntangu bantu ke na kusala ndonga; mu ke kuzwa ntangu ve ya kumona nani bawu kele mpe banani bawu kele. Kasi ntangu yayi, beno nyonso kuna yina zaba ti mu zaba beno ve, beno telemisa maboko ya beno, beno tuba, “Mu ke na nsatu ya Nzambi. Kasi nge zaba munu ve, Mpangi Branham, kasi mu ke na nsatu ya Nzambi. Mu ke telemisa kaka diboko ya munu.”

<sup>213</sup> Ntangu yayi kana beno lenda vwanda kaka swi samu na baminuti fyoti, beno tala mbote, beno landa na bukebi, beno vwanda swi. Ntangu yayi mu zola tuba ve ti, ntangu mu me tuba, “beno vwanda swi,” . . . Kana Mfumu kusala kima mosi, beno zola kumisa Mfumu; yina zola tuba kusambila. Kasi yina mu zola kutuba, “kubaluka bisika nyonso, kutelama,” beno zaba, yina ke luzitu ve. Beno me mona? Mpe Mpeve-Santu kele na nsoni mingi, nsoni mingi. Beno me mona? Kaka kima ya mutindu yina kusalama, ya ke bika munu, mpe mu fwana nwana, dyaka, beno me mona. Kasi kana beno kuwa!

<sup>214</sup> Beno ke bambuka nsilulu ya Yandi ya ntete? “Nata bantu na kukwikila nge, mpe na manima vwanda na kuvedila, kima ve ke telemisa kisambu ya nge.” Beno me bambuka yawu? [Dibuundu me tuba, “Amen.”—Mu.] Ya kieleka. Mpe yina kele. . . Mu me monaka yawu kubwa ntete ve, mpe ya ke kubwa ve. Ya kele Nzambi.

<sup>215</sup> Ntangu yayi beto ke sala nswalu na ndonga ya kisambu, samu beto kuzwa bantu mingi kuluta mutindu beto lenda, samu na mambote ya bantu. Kasi beno yina kele na bakalati ya kisambu mpe ti ba bokila beno ve na nkokila yayi, beno simba kalati ya beno, beto ke baka beno. Mbote mingi.

<sup>216</sup> Ntangu yayi beno bayina kele kuna na bakalati ya kisambu ve, beno bambuka moyo. To, beno yina kele kuna, kana beno ke na bakalati ya kisambu to ve, beno kwikila kaka ti Yandi kele mutindu Hebreux kapu 4 awa. “Yandi kele Nganga-Nzambi ya Mbuta yina lenda simbama na bansatu ya bampasi ya beto.” Beno tala kana Yandi kele kaka. . . Beno tala kana Yehowa me monisama Yandi mosi na kati ya bantu ya Yandi, mutindu Yandi salaka na bilumbu ya Sodome. Mbote mingi.

<sup>217</sup> Mbote mingi, tata. Ntangu yayi beto sambila, ntangu yayi, beno vwanda mpenza na luzitu. Ntangu yayi beno bambuka moyo ti, Ndinga yina me katuka na Nzambi me lutila yina muntu nyonso lendaka tuba. Ntangu yayi, bakala yayi awa, mu—mu zaba yandi ve. Mpe mu banza ti yandi kele. . . Nge kele nzenza samu na munu, mutindu yina ve, tata? [Mpangi-bakala me tuba, “Yinga.”—Mu.] Nge kele nzenza. Beto zaba kima mosi, ti beto zole fwana kutelama na Ntwala ya Nzambi kilumbu mosi;

mutindu bantu, beto fwana kukutana Kuna. Yayi kele kukutana ya beto ya ntete.

<sup>218</sup> Ntangu yayi kana beno me kwisa awa, kana beno kele ya kubela, mu zaba ve; ya lenda vwanda kima yankaka, beno me mona. Kasi kana mu—kana mu tetika maboko na zulu ya beno, munu kutuba, “Nkembo na Mfumu! Beno kwenda, beno kuzwa mavimpi ya mbote.” Ya kele mbote mingi. Beno lenda kwikila yawu. Kasi yinki kana Yandi tuba na beno yina ke na kutambula ve na beno? Ntangu yayi, beno me mona, ya ke luswaswanu, na yawu beno zaba ti yina ke talisa kidimbu ya Yandi. Beno me mona, yina lenda ve kuvwanda kidimbu ya munu. Mu kele muntu; mu lenda zaba ve kima mosi samu na yandi. Mu me tuba kaka na yandi ti, “Mu zaba nge ve.” Yandi zaba munu ve. Kasi yinki yawu ke sala? Yawu ke talisa kidimbu ya Yesu Klisto mutindu mosi mazono, bubu yayi, mpe kukonda nsuka. Na kuzabaka ti ya lendaka vwanda ve munu, ya lendaka vwanda munu ve, samu ti mu zaba muntu yango ve. Mu ke telemisa diboko ya munu; *yayi* kele Ndinga. Beno me mona? Mu zaba yandi ve. Yandi zaba munu ve. Kasi kidimbu ya Yesu Klisto . . .

<sup>219</sup> Kana Yesu vwandaka ya kutelama awa, mpe yandi, mbevo, kana yandi zolaka tuba, “Mfumu Yesu, belusa munu,” yinki Yesu zolaka tuba na yandi? “Mu salaka yawu dezia.” Ya kieleka? [Dibuundu me tuba, “Amen.”—Mu.]

<sup>220</sup> “Yandi lwalaka samu na masumu ya beto; na bamputa ya Yandi beto kubelukaka.” Lusumbu nyonso yina beto lenda kuzwa kusalamaka na Calvaire. Katuka kuna, ya kele lukwikilu, samu na kukwikila kisalu yina ba me manisaka. Ya kieleka? [Assemblée me tuba, “Amen.”—Mu.] Mbote mingi.

<sup>221</sup> Ntangu yayi, ntangu yayi kana Yesu ke na moyo, mpe ti mu me zonza Ndinga ya Yandi . . . Beno bawu yayi, kuvutuka na kukikulumusa mpe lukwikilu yango, na kukwikilaka Ndinga ya Yandi. Ntangu Yandi kutanaka na munu na nokila yina, Yandi tubaka, “Ya ke salama ti nge ke zaba mpe binsweki ya bantima ya bawu. Kana bawu kwikila ve na kidimbu yina ya ntete ya diboko, bawu fwana kwikila yayi.” Beno me mona? “Kana bawu sala yawu ve, kuna menga ke sala nsingululu na ntoto.”

<sup>222</sup> Kaka mutindu ya salamaka na bilumbu ya Moise. Yandi tubaka, “Kana bawu kwikila bidimbu zole yayi ve, na yawu tiamuna menga na zulu ya ntoto,” beno me mona, “tiamuna masa na zulu ya ntoto, ya ke kuma menga.”

<sup>223</sup> Ntangu yayi kaka samu na kuzaba, kana mu lenda mona yinki kele dyambu ya nge, yina ke ndimisa nge mpe ke sala ti nge kwikila, mutindu yina ve? [Mpangi-bakala me tuba, “Ya kieleka.”—Mu.] Nge zaba ti ya lendaka vwanda kaka kidimbu ya Muntu yina mu ke na kuzonzilaka, Yesu Klisto.

<sup>224</sup> Muntu yayngo, na yina mu me tala yandi kaka, yandi me vutuka na manima. Yandi me fikama na kivudi mosi. Ya ke na



kima ve yina medecine lendaka sala samu na kusadisa bakala yayi. Yandi zola kufwa. Ya kieleka. Ba salaka yandi lipaso, mpe lipaso yango vwandaka lipaso ya prostate. Mpe ya kele cancer, mpe cancer me mwangana na nzutu ya yandi nyonso. Kana ya kele kieleka, telemisa diboko ya nge. Kaka Nzambi lenda belusa yandi. [Mpangi-bakala me tuba, “Alleluia! Alleluia! Alleluia!”—Mu.] Kasi, tala, mu zola kutuba kima mosi na nge, tata. Dyabulu yina lendaka kubumbama na ntwala ya mbele ya dokotolo, kasi yandi lenda ve kubumbama na ntwala ya Nzambi. Nge me kwikila yawu? Nge me kwikila yawu? [“Oh! Oh!”] Na yawu mu ke sambila, ti, na Nkumbu ya Yesu Klisto, bika ti kima yango kubika yandi, bika ti bakala yayi kuzinga. Kima kele ve; kaka kulemba. Mbote mingi.

225 Nge na munu kele banzenza mosi na mosi, bakala na kento me kutana. Ntangu yayi, mutindu muntu, mu zaba nge ve. Mpe mu banza ti, mutindu kento, nge zaba munu ve; mu banza ti nge monaka nkumbu ya munu, to foto, to kima ya mutindu yina. Kasi beto zabana ve mosi na yankaka. Yina kele bankadulu ya beto. Beto zaba ve nkadulu ya mosi na yankaka. Kasi kidimbu ya Klisto, Yandi kele Ndinga, mpe Ndinga kele nsilulu ya kilumbu yayi. Beno me kuwa munu kuzonzila yawu. Na yawu bidimbu ya Yandi ke talisa Yandi awa. Munu ve ke talisa Yandi. Mu zaba nge ve. Nge me bakula. Dibuundu ya beto—ya beto me kuwa yawu? [Dibuundu me tuba, “Amen.”—Mu.] Beno me mona? Mu kele—mu kele muntu. Mu kele kaka mpangi ya beno ya bakala.

226 Mutindu kento yina na dibulu ya masa, ke tuba kima yina ke na kutambula ve, kima ke na kutambula ve na beno, to yina beno ke na yawu nsatu, to samu na yinki beno kele awa. Bika ti Nzambi kuvwanda zuzi ya yawu. Nge ke na kimbevo ya anemie. Ya kele kieleka, mutindu yina ve? [Mpangi-kento me tuba, “Yinga.”—Mu.]

227 Mu—mu ke tutaka yayi bambala mingi, ya ke na muntu ke na kubanzaka ti mu me banza yawu. Mu ke banzaka yawu ve. Ve. Bambala mingi, mu ke kuwaka yawu, kukatuka na muntu. Nge lenda ve kubumba mabanza ya nge ntangu yayi. Ntangu yayi ya kele na kutala, mu zaba, bantu zole ya ntembe mpenza yina me vwanda awa. Beno me mona? Na yawu ntangu yayi beno bambuka moyo ti mu lenda zonza bankumbu ya beno, mpe, Nzambi lenda, na yawu beno bika kubanza mutindu yina. Bika mu talisa na beno.

228 Tala awa, mama. Tala munu. Mu zaba ve yina Yandi me tuba na beno, kasi mu—mu zaba yina Yandi kele. Mpe yina kele kidimbu ya Yandi ya kutalisama. Yinga, ya ke kimbevo ya anemie, menga, masa.

229 Ntangu yayi, awa, awa ya ke na kima mosi. Beto tala kana ba ke banza ti yayi kele kubanza. Nge ke na mwana yina nge ke na kusambilaka, yandi kele awa. [Mpangi-kento me tuba,

“Yinga.”—Mu.] Ya kieleka. Ya kele, na laka, [“Yinga.”], ba-amygdale, ba-adenoid. Na ntangu fyoti ba ke pasula yawu. Ya kele kieleka ve? [“Yinga.”] Baka muswale yayi mpe kwenda tula yandi yawu, mpe kwikila. [“Yinga.”] Kutula ntembe ve. Ya ke vwanda na nsatu ya lipaso ve. Ntangu yayi kwikila na ntima ya nge ya muvimba.

<sup>230</sup> Yinki mutindu? Dyambu ya kento yayi awa, kele, ti nge kele na boma ya kima mosi. Nge ke na boma ti ditono ya lubutuku me soba na cancer. Uh-huh, uh-huh. Ntangu yayi kwenda, kwikila, mpe ya ke vwanda mutindu yina ve. Kwenda kaka, kwikila na ntima ya nge ya muvimba. Bidimbu, ya munu ve; ya Yandi!

<sup>231</sup> Beno me kwikila ntangu yayi? [Dibuundu me tuba, “Amen.”—Mu.] Yina lenda nata muntu nyonso na kukwikila. [“Amen!”]

<sup>232</sup> Ntangu yayi, mu zaba nge ve. Mu kele nzenza samu na nge. Nzambi zaba nge. Nge me kwikila yawu. . . ? Nge zaba ti mu zaba nge ve, mpe nge zaba ti nge zaba munu ve, na yawu nge ke kwikila ti Mpeve yina ke na kuzonzaka lendaka vwanda ve mpeve ya munu? Samu ti, munu, na mutindu muntu, mu zaba nge ve. Kasi kidimbu ya Ndinga ya nsilulu kele Ndinga yina kele na meno kulutila mbele yina kele na meno balweka zole, mpe ke swasikisa mabanza mpe bansatu ya ntima.

<sup>233</sup> Nge ke ya kubela mpenza. Nge vwandaka na kimbevo ya bakento, ya vwandaka na kivumu, mpe kivumu yango kumaka na cancer. Mpe nge kwendaka mpe bakaka mwa bankisi, ya vwandaka bankisi ya radium, mpe kima mosi kaka yawu salaka kele ti yawu mwanganaka na nzutu ya nge nyonso. Mpe nge ke—nge ke kufwa kana Nzambi kubelusa nge ve. Yina ke kieleka. Nge me kwikila ntangu yayi ti Yandi ke belusa nge? [Mpangi-kento me tuba, “Yinga.”—Mu.] Bika ti Nzambi ya Mazulu kunganina dyabulu yina me bumbama na ntwala ya dokotolo. [“Oh!”] Yandi lendaka kubumbama na ntwala ya radium, kasi yandi lenda kubumbama ve na ntwala ya Mpeve-Santu. Kwenda, kwikila Yandi, ntangu yayi, mpangi-kento. Kutula ntemba ata fyoti ve, kasi kwikila.

<sup>234</sup> Nge ke kwikila ti Nzambi lendaka belusa kimbevo yayi ya asthme, mpe kupesa nge mavimpi ya mbote? [Mpangi-bakala me tuba, “Yinga.”—Mu.] Nge me kwikila yawu? Na yina landila nzila ya nge, na kusepelaka, tuba, “Matondo na Nge, Mfumu. Mu me kwikila ti asthme ya munu me mana.”

<sup>235</sup> Yinki mutindu? Nge kele muntu ya kidi-kidi. Kidi-kidi ya nge me sala bilumbu mingi. Kuna, yawu me sala mputa na estomac ya nge, yina me nata mpasi na estomac ya nge—ya nge. Mpe nge zola. . . Nge zola kudya madya ya nge ya nkokila? Nge lenda sala yina mu ke tuba na nge na kusala? Kwenda, kudya, na Nkumbu ya Mfumu Yesu.

236 Nge me kwikila na ntima ya nge ya muvimba? [Mpangi-kento me tuba, “Mu me kwikila.”—Mu.] Nge kele ntwenya ya kento ya mbote, mu banza. Nge ke kwikila ti mu kele kisadi ya Yandi? [“Amen.”] Nge ke kwikila ti kidimbu ya Yandi lendaka vwanda awa, na . . . Ndinga, Yawu mosi, mpe nsilulu ya kilumbu yayi, “Bisalu yina Mu ke salaka beno mpe ke sala yawu?” [“Amen.”] Mu lenda ve kubelusa. Yandi salaka yawu dezia; kasi kidimbu ya Yandi ke talisa Yandi, ya lenda tuba yinki ke na kutambula mbote ve na nge. Nge kele na kimbevo ya bamama, kimbevo ya bakento. [“Yinga, tata.”] Nge ke kwikila ti Nzambi ke belusa yawu ntangu yayi? [“Yinga. Amen.”] Landila nzila ya nge, ya ke sala nge dyaka mpasi ve. Kwikila na ntima ya nge ya muvimba.

237 Nge ke kwikila ti mu kele kisadi ya Yandi? [Mpangi-kento me tuba, “Yinga, tata.”—Mu.] Kana Nzambi kutuba na munu yina kele mpasi ya nge, nge ke kwikila ti ya kele kidimbu ya Yesu Klisto? Ya kele na mukongo ya nge. Ya kele dyaka ve. Kwenda, kwikila na ntima ya nge ya muvimba. Kwikila.

238 Kwisa, mama. Nge mpe ke na mpasi na estomac. Kwikila na ntima ya nge ya muvimba, mpe kwenda kudya madya ya nge ya nkokila. Zimbana yawu. Yesu Klisto me pesa nge mavimpi ya mbote.

239 Kwisa. Mpasi ya nge kele menga ya nge. Nge ke na diabete. Nge ke kwikila ti Nzambi ke pesa nge mavimpi ya mbote mpe ke belusa nge na yawu? Landila nzila ya nge, mpe tuba, “Matondo na Nge, Mfumu Yesu,” ke kupesa nge mavimpi ya mbote. Kwenda, kwikila na ntima ya nge ya nionso.

240 Kwisa. Mukongo ya nge, nge ke kwikila ti Nzambi ke belusa mukongo mpe ke pesa nge mavimpi ya mbote? Landila nzila ya nge, mpe sepela, mpe tuba, “Matondo na Nge, Mfumu Yesu.”

241 Nge mpe vwandaka na mpasi na mukongo ya nge. Landila kaka na kutambula, tuba, “Matondo na Nge, Mfumu. Mu me beluka.” Kwikila yawu na ntima ya nge nyonso.

242 Nge mpe vwandaka na mpasi ya mukongo. Yinki nge zaba samu na yawu? Kwikila na ntima ya nge nyonso ntangu yayi, mpe landila nzila ya nge mpe nge kuzwa mavimpi ya mbote. Kwikila ti Yesu Klisto me pesa nge mavimpi ya mbote. “Kana nge lenda kwikila, nyonso lenda salama.” Mbote mingi.

243 Yinki kana mu tuba na nge dyambu ve, yandi luta kaka mpe ti munu kutetika mwana ya kento kaka maboko, nge ke kwikila ti yandi ke kuzwa mavimpi ya mbote? Ba ke mona yina ke tambula mbote ve. Nge ke kwikila ti yandi me kuma na mavimpi ya mbote? Kwisa awa. Mu me nganina dyabulu yayi, na Nkumbu ya Yesu Klisto. Bika ti ngolo ya Nzambi kubelusa mwana yayi. Amen. Kutula ntembe ve, kutula ntembe ata fyoti ve, mpe yandi ke kuzwa mavimpi ya mbote. Kwikila na ntima ya nge nyonso.

244 Kana Nzambi kubelusa nge ve, nge ke tambula na ba-bequille kilumbu mosi, samu na arthritis. Kasi nge ke kwikila

ti Nzambi ke belusa arthrite ya nge? Na yina kwenda, tuba, “Matondo na Nge, Mfumu. Mu ke kwikila Nge, mpe Nge ke pesa munu mavimpi ya mbote.” Mbote mingi.

<sup>245</sup> Kwisa ntangu yayi. Ya kele kieleka samu na bamvula ya nge. Nge kele muntu ya kidi-kidi mingi. Nge ke muntu ya kidi-kidi mingi, na mpimpa. Ntangu nge ke salaka kisalumu mpe nyonso yina, nge ke muntu ya kidi-kidi mingi. Nge me kwikila ntangu yayi? Na yina yawu ke sala nge mpasi dyaka ve. Landila nzila ya nge, tuba, “Matondo na Nge, Mfumu Yesu.”

<sup>246</sup> Kwisa, tata. Nge ke kwikila ti Nzambi ke belusaka kimbevo ya ntima? [Mpangi-bakala me tuba, “Yinga.”—Mu.] Ti Yandi ke belusa ntima ya nge? Landila kaka na kukwenda na ntwala, tuba, “Matondo na Nge, Mfumu. Mu ke kwikila na ntima ya munu nyonso.”

<sup>247</sup> Nzambi ke belusaka Tuberculose, mpe ke pesaka mavimpi ya mbote, mpe. Nge ke kwikila yawu, tata, na ntima ya nge nyonso? [Mpangi-bakala me tuba, “Mu me kwikila yawu.”—Mu.] Mbote mingi. Landila nzila ya nge mpe sepela, tuba, “Matondo na Nge, Mfumu Yesu.”

<sup>248</sup> Yinki samu na beno bayina kele kuna, beno me kwikila? Yinki samu na beno nkonga ya bantu? Bayankaka kati ya beno na nkonga ya bantu ntangu yayi beno me kwikila.

<sup>249</sup> Bakala yayi me kuvwanda awa, na bronchite, nge ke kwikila ti Nzambi ke belusa kimbevo ya bronchite? Mbote, nge lenda kuzwa yina nge me lombwa, kuna. Amen.

<sup>250</sup> Muntu ya hypertension, yina kele ya kuvwanda na manima ya yandi kuna. Nge ke kwikila ti Nzambi ke belusaka hypertension? Yawu me katukila nge, tata. Mu zaba yandi ve, ata mbala mosi ve ti mu me monaka yandi na luzingu ya munu.

<sup>251</sup> Tala, tata, nge ke kwikila ti ba-spasme yina ke na kati ya misisa ya nge, misisa ya ba-spasme ya ba-nerf, nge ke kwikila ti Nzambi ke belusa yawu? Nge ke kwikila? Telemisa diboko ya nge kana nge ke kwikila. Mbote mingi.

<sup>252</sup> Kento ya nge yina me vwanda kuna, yandi ke na mpasi ya sinusite. Nge me kwikila ti yawu me bika nge, mpe, mpangi-kento?

<sup>253</sup> Mama yina me vwanda kuna na manima ya beto, yandi kele na nevrite. Nge ke kwikila ti Nzambi ke belusa nevrite ya nge, mama?

<sup>254</sup> Tala mama mosi yina me lwata mwa kazaka, kazaka ya mbwaki, awa. Yandi kele ya kuvwanda kuna. Yandi kele na mpasi ya sinusite, mpe. Nge ke kwikila ti Nzambi ke belusa kimbevo ya nge ya sinusite? Telemisa diboko ya nge, kana nge ke kwikila yawu.

<sup>255</sup> Muntu nyonso yina kele na kati awa yina ke kwikila ti bidimbu ya Yesu Klisto kele na kati ya beto, na nkokila, telemisa

diboko ya nge, tuba, “Mu ke kwikila yawu.” [Dibuundu me sepela mpe me tuba, “Mu me kwikila yawu!”—Mu.]

<sup>256</sup> Beno nyonso yina kele na kati awa, yina zola ndima Yandi mutindu munganga ya yandi, beno telama, mpe beno tuba, “Mu ke kwikila yawu.” Beno telama. Beno telama, na bakiti ya beno, nionso yina ya kele. Yesu Klisto mutindu mosi mazono, bubu yayi, mpe kukondwa nsuka. Mu ke pesa yawu na nge, na Nkumbu ya Mfumu Nzambi.



*NZAMBI KE NA KUKITALISA YANDI*  
*MOSI NA BIDIMBU YA YANDI* KNG64-0320  
(God Identifying Himself By His Characteristics)

Nsangu yayi ya Mpangi William Marrion Branham, kulongamaka na Kingelesi, na nokola ya Kilumbu ya tanu, ya kilumbu ya 20 ya Ngonda ya tatu, na mvula 1964, na Denham Springs High School na Denham Springs, Louisiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2020 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisdilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)